



NOTAT TIL SAGEN

Oqaaseqaammut 22. juli 2016-imeersumut ilanngussaq

J.nr. 2014-324-0013

Suliap ingerlasimanerata allaaserineqarnera

A ikiortitut illoqarfimmi K-mi Utoqqaat Illuanni inissisimagallartussatut 1. august 1985-imi piffissap ilaannaani sulisartussatut 1. august 1990-imiillu piffissaq tamaat sulisartussatut taamani ... Kommunimit (massakkut K Kommunimit) atorfinitsinneqarpoq. Kommunip A allakkatigut 12. december 1995-imeersutigut nalunaarfigaa atorfia ...-mut 1. juli 1994 aallarnerfigalugu allangortinneqartoq, Utoqqaat Illuata pisortaa qaninnerpaatut qullersaralugu. K Kommunip A allakkatigut 6. juli 2010-meersutigut nalunaarfigaa atorfia Utoqqaat Illuanni inissisimagallartussatut ...-mut 1. juli 2010 aallarnerfigalugu allangortinneqartoq, Utoqqaat Illuata pisortaa qaninnerpaatut aamma qullersaralugu. Atorfinitsitsineq pillugu allakkanit erserpoq atorfik taanna suliartoqquneqaratarsinnaanermut tapeqartoq, qaammatit pingasukkuutaat iluanni nalunaaquttap akunneri 37 tikillugit qaangiuttoornut matussutaasunik.

Utoqqarnut tunngasuni pisortap ...-p A oqaloqatigineqarnissaanut 23. september 2014-imi aggeqquaa. Ataatsimiinnermi tassani immikkoortortaqarfimmi peqqissaasoq ... aammattaaq peqataavoq. A-p taxakortiminik immi-nut atugassiissutigineqartumik atonerluineranik kommunip ilimatsaassinera ataatsimiinnermi sammineqarpoq. A ataatsimiinnermi tassani nalunaarfigineqarpoq suliunnaarsinneqartoq.

“Taxakortimik biilernernut suliambut attuumassuteqanngitsunut atonerluinermik ilimatsaassineq” tunngavigalugu A-p peersissamaarneqarnera pillugu suliampi illua’tungiusup isumaanik tusarniaaneq K Kommunip allakkatigut

24. september 2014-imeersutigut aallartippaa. Suliami illua'tungiusup isumaanik tusarniaalluni allakkanit makku erserput:

"Matumuuna nalunaarfigineqassaait Utoqqarnut Tunngasuni pisortaqatigiit aalajangermata suliamik peersitsinermut tunngasumik aallartitsiniarlutik.

Taxakorti taxarnermut sulinermit attuumassuteqanngitsunut atortarsimagit Utoqqarnut Tunngasuni pisortaqatigiit [K Kommunimi] sulisoqarnermut immikkoortortaqarfimmut nalunaarutigaat. Taxakorti piffissami 1. juni 2014-imit 30. august 2014-imut 722 kr.-t nalinginut atortarsimagit pisortaqatigiit ilimagaat. Akiligassiissutit nassuiaatitaannit erseqqissumik erserpoq Utoqqaat Illuannut, suliffinnit angerlarsimaffinnut aamma suliffinnut taxartarsimasutit.

Ilanngussaq 1, qupp. 1 takuuk:

1.6.2014 nal. 14:16: [Angerlarsimaffimmit] taxarneq	81,- kr.
1.6.2014 nal. 16:56: [Suliffimmit] taxarneq	81,- kr.
1.6.2014 nal. 17:19: [Suliffimmit] taxarneq	83,- kr.
Junimi taxarneq, katillugit	245,-kr.

Ilanngussaq 2, qupp. 3 takuuk:

21.7.2014 nal. 14:15: [Suliffimmit] taxarneq	39,- kr.
26.7.2014 nal. 09:31: [Angerlarsimaffimmit] taxarneq	79,- kr.
26.7.2014 nal. 10:03: [Suliffimmit] taxarneq	80,- kr.
Julimi taxarneq, katillugit	198,- kr.

Ilanngussaq 3, qupp. 1 takuuk:

14.8.2014 nal. 11:02: [Suliffimmit] taxarneq	47,- kr.
14.8.2014 nal. 11:42: [Napparsimm. Aqqummit] taxarneq	50,- kr.
15.8.2014 nal. 11:18: [Suliffimmit] taxarneq	50,- kr.
18.8.2014 nal. 10:43: [Napparsimm. Aqqummit] taxarneq	51,- kr.
30.8.2014 nal. 11:55: [Angerlarsimaffimmit] taxarneq	81,- kr.
Augustimi taxarneq, katillugit	279,- kr.
<u>2014-imi junimit augustimut taxarneq, katillugit</u>	<u>722,- kr.</u>

Akiligassiissutit nassuiaatitallit pisortaqatigiinnit 23. september 2014-imi pissarsiarineqartut takutippaat pisortaqatigiit paasinninnerat malilugu sulinermit attuumassuteqanngitsumik angerlarsimaffinnit Utoqqaat Illuannut utimullu aamma

[Nappars. Aqqummiit] marloriarlutit taxartarsimasutit. Taamaaliorneq [K Kommunip] sulisoqarneq pillugu mappersagaa tunngavigalugu soraarsitsinermut tunngavissaavoq, tassanilu imaattunik allassimasoqarpoq:

“Atorfeqartitaasup atorfeqartitaanermi atugassarititaasut annertuumik/kusanaatsumik unioqqutippagit peersitsisoqarsinnaavoq.

Atorfeqartitaasooq sakkortuumik/kusanaatsumik ilumoorfiginninngitsumillu iliuuseqaruni, pisortarisamut, suleqatinut sullitanulluunniit sakkortusaaruni/annersaaguni, aningaasatigut peqquserlukkuni tillikkunilu, suliaminik suliarinnikkumanngikkuni atorfeqartitaaniluunniit allatigut annertuumik atornerlukkuniuk peersitaasinnaavoq.”

Pisortaqtigiit taxartarsimanernik taxakortimik atornerluisoqarsimaneranik ilimatsaassisitsisunik nassaarnerat [...-tut] atorfeqartitaaninnik 1. juli 2010-imi aallartittumik annertuumik atornerluineruvoq. Taxakorti tatiginninneq tunngavigalugu atugassiissutaavoq, taamaallaat sulinermut atatillugu taxarnernut atornerqartussa. [K Kommunip] taxakortia atorlugu sulinermut atatinngu taxarneq atorfeqartitaaninnut tunngasunik atornerluineruvoq, taxakortinillu atornerluineq peersitsinermut tunngavissaavoq.

[K Kommunip] sulisoqarneq pillugu mappersagaanit erserpoq taamaallaat sulinermut atatillugu taxartoqarsinnaasoq:

“Taxakorti taxabonillu taamaallaat suliassanut sulinermut attuumassuteqartunut atatillugu atornerqarsinnaapput. Tassa imaappoq suliassat qaninnerpaatut pisortarisamit suliassiissutigineqartut imaluunniit suliassat suliap suussusiata toqqaannartumik nassatarisai pineqartut. Aalajangersakkamik taassuminnga unioqqutitsineq atorfeqartitaasup atorfeqartitaanernut tunngasunut ilungersunartumik kinguneqartinneqarsinnaavoq.

Pisuni taxat atornerqarsinnaanerannik nalorniffiusuni qaninnerpaatut pisortarisag akuersitinniaqqaarneqartariaqarpoq.”

Pisortaqtigiit akiligassiissutitut nassuiaatit tigoreerlugit taxartarsimanitit taxakortinik atuneq pillugu tunaartarisani siuliani taaneqartuni allaaserineqartutut suliassanut suliamut toqqaannartumik attuumassuteqarnersut nalornissutigisi-

mavaat. 1. juni 2014-imi, 30. juni 2014-imi, 21. juli 2014-imi, 26. juli 2014-imi, 14. august 2014-imi, 15. august 2014-imi, 18. august 2014-imi kiisalu 30. august 2014-imi taxarsimanerit taaneqartut pisortaqatigiit akueriumanngilaat. Taxarsimanerit taakku taxakortimik atornerluinertut pisortaqatigiinnit nalilerneqarput.

Utoqqaat Illuata taxakortimik namminermt atugassiamik atuineq pillugu ilitser-suusiaani imaattunik allassimasoqaarpoq:

“Sulisut taxakortimik inummut namminermt atugassiamik tunineqarsimasut taxakorti eqqortumik atussallugu pisussaaffeqarput. Taxakorti taamaallaat atornerqarsinnaavoq suliartoqqusisoqarnerani imaluunniit Utoqqaat Illuannik atuisunik kiffartuussinermut atatillugu naalakkiutaasumik suliassaqarpat.” **Ilanngussaq 4** takuuk.

Angerlarsimallutik suliartoqquneqaratarsinnaallutillu pigaartuusut kisimik taxakortinik atuisinnaatitaapput, peqqissaasullu kisimik angerlarsimallutik UI-mi pigaartuusarput, aamma peqqissaasut pedelilu kisimik suliartoqquneqaratarsinnaallutik UI-mi pigaartuusarput. Sulisoqatigiillu taakku aggeqquneqarsinnaapput, suliartoqqullugillu naalakkaneqarsinnaallutik. Illit piffissap nalinginnaasumik suliffiup avataani suliartoqqullutit naalakkaneqanngikkuit taxarsimanitit suliambut attuummassuteqartutut isigineqarsinnaanngillat. Taxarnernut akiligassiissutit nassuiaatitaanni takuneqarsinnaavoq suliffinnut suliffinnillu taxartarsimasutit, taxarnerillu taakku sapaatit akunnerisa naaneriniinngillat imaluunniit piffissap suliffiusup nalinginnaasup avataatigut sulinermt attuummassuteqaratik.

Pisortaqatigiit paasinninnerat unaavoq taxarsimanerit nassuiaatitallit qulaani taaneqartut aggeqquneqarnermt suliartoqquneqarluniluunniit naalakkaneqarnermt tunngasuunngitsut, taamaattumillu taxarsimanitit sulinermt attuummassuteqartutut akuerisinnaanagit. Tamanna peqqissaasunit pedeli nassaarisinnaanngikkaangamikku qaqutiguinnaq aggeqquneqartarsimaninnik tunngavilersorneqarpoq. Namminerisamik taxarnerit atornerluinertut isigineqarnertik pissutigalugu akuerineqarsinnaannginnerat pisortaqatigiit ilinnut sakkortunerpaamik uparuarusuppaat.

Suliamut taxarsimanernut tunngasumut atatillugu Utoqqarnut Tunngasuni pisortaqatigiinnit 23. september 2014-imi oqaloqatigineqarninni oqaatigaat pedelilu

ilaanneeriarlusi suliarloqquneqaratarsinnaasartusi, taamaattumillu pisut ilaanni sivitsortumik ataatsimeeqataareerlutit qasoqqagaangavit taxarlutit angerlartartutit. Tamanna akuerineqarsinnaangilaq, suliffinnit angerlernerit illit nammineq isumagisassaraat akiligassaralugullu, [K Kommunip] taxakortia taxarnernut sulinermut attuumassuteqanngitsunut atornagu.

Qulaani taaneqartut tunngavigalugit matumuuna nalunaarfigineqassaait atorfeqartitaanerit [K Kommunip] atorunnaarsissamaara. Soraarsitsisoqassasoq aalajangiisoqarpat tamanna piffissap tusarniaaviusup naaneranit ingerlaannartumik sunniuteqartumik atuutilissaaq.

Piffissami tusarniaaviusumi tamarmi aalajangiisoqarnissaata tungaanut sulionnaarsinneqassasutit pisortaqtigiit aalajangiipput. Tassa imaappoq sulissanngitsutit, kisiani suli atorfeqartitaasutit nalinginnaasumillu akissarsiaqassasutit.

Kommuni inaarutaasumik aalajangiisinnaalersinnagu pissutsit qulaani taaneqartut pillugit oqaaseqaatinnik saqqummiussinissannut suliassat suliarineqartarnerat pillugu inatsimmi § 19 tunngavigalugu periarfissaqartinneqassaait. Oqaaseqaatissaqaruit oqaaseqaatitit [taamani utoqqarnut tunngasunut pisortaasumut] imaluunniit sulisoqarnermut immikkoortotaqarfimmut e-mailikkut [...-ikkut] 8. oktober 2014 nal. 12:00 qaangertinnagu tunniutereersimaqquneqarput.

Oqaaseqaatinnik saqqummiussinngikkuit [K Kommuni] paasissutissat pigineqartut tunngavigalugit aalajangiissaaq.

Allakkat ukua assilinerat ilanngullugu nassiunneqarpoq, taannalu peqatigiiffiup/-kattuffiup ilaasortaaffigisavit akuliutsinneqarnissaa kissaatigigukku tassunga nassiussaavat." (Atorfeqarfimmi nutsigaavoq)

Ilanngussat 1-imit 3-mut suliame illua/tungiusup isumaanik tusarniaatitut allakkanut ilanngullugit nassiunneqartut tassaapput taxarsimanernut uppernarsaatit. Utoqqaat Illuata taxakortinik atuineq pillugu malittarisassai ilanngussatut 4-tut ilanngunneqarput. Tassannga makku ilaatigut erserput:

"Korti nammineq pigisag

Suleqatit taxakortinik namminneq pigisassaminnik tunineqartut pisussaaffigaat kortip eqqortumik atornissaa.

Korti taamaallaat atorneqarsinnaavoq suliartoqqusaanermi imalunniit arlaannik kiffartuussinissamik suliakkerneqarnermi.

Korti ataatsimoorusaq

Korti taamaallaat atorneqarsinnaavoq malittarisassat atuuttut tunngavigalugit, imatut paasillugu:

Sapaatit akunnerisa naaneranni suliarturnermi, bussi siulleg sulii angalalinngitsooq suliarthoraanni.

Suliffiimmiit angerlarnermi, bussi kingulleq aallareersimasooq soraaraanni.

Suliartoqqusaalluni taxarnerit, immikkoortortaqarfimmi pisortap suliartoqquppattit.

Korti ataatsimoorusaq immikkoortortaqarfinniiginnassaaq. Kortip atornerani aataani allassimasut malittarineqassapput:

Taxa Utoqqaat Illuata eqqaanut unippat:

Kortip immikkoortortaqarfimmut aanerani taxartitsisoq utaqqqeqquneqassaaq. Korti atoreerpat aquttup tunniussaa uppernarsaat (kvittering) ilanngullugu immikkoortortaqarfimmut utertinneqassaaq.

Utoqqaat Illuanniit taxarneq aallartippat:

Suli aallartinnani taxartitsisup korti naqissavaa, taamaalereerpallu korti immikkoortortaqarfimmut utertinneqassaaq. Taava aatsaat angalaneq aallartissaaq. Taanna uppernarsaat taxartitsisup angalareernermi tunniussaa, periarfissaq siulleg atorlugu immikkoortortaqarfimmut imalunniit allaffimmut tunniunneqassaaq.

Immikkoortortaqarfimmi taxarnernik allattuiffik - kortip atornera pillugu

Immikkoortortaqaarfiit taxakortillit tamarmik taxarnermut allattuiffeqassapput, taxarnerit tamaasa qanga, piffik kortimillu atuisup aqqa erseqqissoq allanneqassapput.

Nakkutillineq

Taxaatileqatigiiffik regningimik nassitsigaangami taxarnerit erseqqissumik allatorneqarsimasut tamaasa ilannguttarpai. Taanna taxarnermik allattuiffimmiittunut sanilliunneqarsinnaavoq.”

A suliami illua'tungiusup isumaanik tusarniaaneq pillugu oqaaseqaatiminik allakkatigut 6. oktober 2014-imeersutigut saqqumiussivoq. Taakunanga ilaatigut makku erserput:

“Aallaqqaasiutitut oqaatigerusuppara atorfeqartitaanera 1. juli 2010-mit aallartingimmat, kingumulli 1. august 1985-imiilli aallartimmat. Atorfeqartitaaneq piffissap ingerlanerani marlussoriarluni allangortinneqartarsimavoq, tassalu kingullermik 2010-imi, taamani [...-tut] taamalu kommunimi ukiorpassuit suleerlunga soraarnerussutisiaqaataasumik atorfeqartilerlunga atorfinitsinniarlunga kommunip neqeroorutaa akueriumallugu aalajangerama.

Uannik taxakortimik atornerluisimasutut unnerluutiginninnerit eqqarsaatigalugit taakku uannit isigalugit ima ilungersunartigalutillu naapertuutinngilluinnartigipput ingerlaannaq oqaaseqaateqarfigineqartariaqarlutik.

Aallaqqaataaniilli oqaatigisariaqarpara Utoqqaat Illuanni kommunimilu ukiorpassuarni sulinera tatigeqatigiinnermik ataqeqatigiinnermillu tunngaveqarluinnarsimammatt, tassalu ilaatigut imaappoq taxakortit atugassiissutigineqartut torersumik aqunneqarnissaat pissusissamisoorsimalluni, - tamannalu ullumikkut uggoriinnarsinnaavara, tassami taxarnermi allattuiffivimmik uppernarsaasiussinnaasannik peqannginnama. – Taamaattumik nassuiaatima upperineqarnissaat aalajangiisuusorujussuuvoq, paasisariaqarlunilu taxakortimik atuisinnaanerup atornerlunnissaa soqutigisarinnngilluinnarakku.

Kommunip massakkut allagai imatut nipeqarput peqqissaasut pedelilu kisimik tassaasut Utoqqaat Illuannut suliartoqquneqaratarsinnaallutik pigaartuusartut. Tamanna eqqunngilaq. Utoqqaat Illuanni atorfineqqaarninniilli – tassa imaappoq

1. august 1985-imiilli - suliartoqquneqaratarsinnaanermut tapit atorfirmut tas-sunga ilaasimapput. Taakku atorfeqartitaaneq piffissap ingerlanerani marlusso-riarluni allangortinneqaraluarmalluunniit ataannarsimapput.

Isumaqarpunga aamma kukkunaviarnanga oqaruma ukiorpassuit ingerlaneranni sulinera Utoqqaat Illuata pisortaanut assut qanissimasoq, imatut paasillugu pi-sortap suliassai pingaarnarpaat tassaasimasut pingaarnertigut isummerfiginnin-nerit aamma peqqissaanikkut isummerfiginninnerit, allaffissornikkullu aqutsiner-mi suliassap ilarujussua, matumani [... il.il.] uannut isumagisassanngortinneqar-simallutik, suliassat eqqortumik suliariumaarikka tatigalugu. Apeqqutiniq assi-giinngitsunik arlalinnik ulluinnarni isummerfiginnittarneq uannut aamma isuma-gisassanngortinneqarsimavoq, aalajangiinerit isumatusaartumik tunngaveqarluni pisarumaartut tatigalugu.

Aatsaalliuna utoqqarnut tunngasuni allannguutit nutaanerpaat kingornatigut U-toqqaat Illuanni siusinnerusukkut "pisortaaqqaanik" taaneqartartut akornanni pi-sinnaatitaanermik agguataarinermi annertuumik nikerartitsisoqarsimagunartoq. Oqaatsip "nikerartitsisoqarsimagunarpog"-p atorneqarneranut pissutaavoq siun-nerfik suna siunnerfiginiarneqarnerisooq suli erseqqarlummat. – Tamanna tassaal-luinnarpog piffissap sivisunerusup ingerlanerani oqaluttuassartaq soqutiginarog, suliame matumani sinnaakkutassaasut avataanniittutut isigineqassagunartoq.

Taxarsimanerilli ataasiakkaat uterfigeritartigit:

Sapaat 1.6.2014 nal. 14:16 (81,00 kr.-t) aamma 1.6.2014 nal. 16:56 (81,00 kr.-t)

Tassani pineqartoq tassaavoq sulisut (sulinerminni piffissamik nalunaarsuillutik) naqittagaannik taarsiineq, taannalu naluneqanngitsutut akissarsianik tulluittuni tunniussinerme tunngaviusarpoq. – Naqitakkat taakku qaammatit tamaasa taar-serneqartarput, kortillu [...-t] (sulisut taartaasartullu) missaanniittut pineqarma-ta tamatuma periaaseq aalajangersimakkannersooq malillugu pisarnissaa pisaria-qarpoq, malinnaasinnaajunnaarumangikkaanni. – Pisut ilaanni sapaatit akunne-risa naanerini taamaaliortarpunga, - taamaattumillu taxarneq sulinermut attuu-massuteqartutut isigisarlugu.

Sapaat 1.6.2014 nal. 17:19 (83,00 kr.-t) – Taanna eqqortuunngilaq. Taxaatile-qatigiiffiup naqitanngortitaani pineqartoq tassaavoq ataasinngorneq 30.6.2014 nal. 17:19.

Qularutissaanngilaq ataatsimiinneq sivitsortoortoq imaluunniit suliassaq alla piffissaq suliffiusoq nalinginnaasoq nal. akunneranik ataatsimik qaangerlugu sivi-sussusilik pineqarsimassasoq. Pisumi tassani angerlamut taxarnissara akuerine-qarsinnaasoq isumaqarsimavunga. Piffissap suliffiusup nalinginnaasup naanera pineqarsimasuuppat taamaalorsimanaviannngilluinnaraluarpunga, - kisianni killis-sat qanoq paasineqarnissaannik nassuiaaneq tikipparput. - Taxarsimanerli nam-minerisanut tunngasuunerassallugu sulihamullu attuumassuteqannginnerassallugu eqqunngitsoq isumaqarpunga.

Oqaatigineqartutut taxarnernut ataasiakkaanut suut pissutaanerannut eqqoqqis-saartumik takussutissaateqanngilanga, taxarnerillu ataasiakkaarlugit 100 %-imik qularnaatsumik akissutissarsiniassaguma akissutit taamaallaat Utoqqaat Illuanni nassaarineqarsinnaapput, pisumilu matumani uanga mattussaavunga. – Taa-maattumik – aap, qanoq oqassaanga iliussaangaluunniit?

Ataasinngorneq 21.7.2014 nal. 14:15 siumut utimullu (39,00 kr.-t)

Taxarnek piffissap suliffiusup nalaaniippoq, najugaqartumillu kigutilerisuliaassi-neq allamulluunniit qanittumiittuliaassineq pineqarsinnaalluni. Taxarnek uanga nammineq inuuneqarninnut tunngasuunngilluinnarpoq, - tassungali tunngatillugu oqaatigineqarsinnaavoq pedeli ulloq taanna ferialersimasoq, taamaattumillu ula-pinnerusimallunga, tassami pisumi taamaattumi pedelip suliassaanut akisussaaf-fik – eqqiaaneq ilanngullugu eqqarsaatigalugu – ingerlaannaq tigusarakku. – Aamma pisortaq pedelip toqqaannartumik qullersarisaatut suliassamik ingerlaan-naq tigusisussaasariaqaraluartorluunniit. Pisortamilli oqartarnek oqaluttuaan-ngorsimavoq, taamanilu suliassanik assigiinngitsunik agguataarineq (immaqalu-mi aamma ullumikkut suli) erseqqissumik killissalersorneqarsimanngilaq. Sulias-salli sularineqartussaapput, - pisunilu taamaattumi ikiuunnissara tunuarsimaar-figineq ajorakku pisumi matumani taamaalorsimavunga (pedelip feriarnera ta-maat).

Arfininngorneq 26.7.2014 nal. 9:31 (79,00 kr.-t) aamma arfininngorneq 26.7.2014 nal. 10:03 (80,00 kr.-t)

Pisoq taanna pedelip feriarnerata suli nalaaniippoq, qularnanngilarlu Utoqqaat Illuannit aggeqqusisoqarsimasoq. Periarfissat eqqaariataarsinnaasakka pingasuupput (piffissaq aggeqqusiffiusoq eqqaamalluannikkaluarlugu ilumut aggeqqusiffiusimasutut nalunngisakka), tassalu *oqilisaassisarfimmi qullit ajornartorsiutaanerat, oqaluttaatit ajornartorsiutaanerat, kiappallaalersimasoq igaffimmi atugassamik aalajangersimasumik qitiusumi toqqorsivimmit inniminniisoqarnisaa tallimangornermi puigorneqarsimasoq.* – Oqaatigineqartutulli sorpiaat pineqarnerat maannga angerlarsimaffinnit paasiniassallugu ajornakusoortorujussuvoq.

Sisamanngorneq 14.8.2014 nal. 11:02 (47,00 kr.-t) aamma sisamanngorneq 14.8.2014 nal. 11:42 (50,00 kr.)

Utoqqaat Illuata innarluutilinnut bussii piffissami sivilunerusumi biilileriffimmiissimapput, sulillu tassaniillutik. Utoqqaat Illuat aaqqiissutitut bussinik [...-mit] attartorsimavoq, taakkuli piffissami sivilukuluttumi aamma biilileriffimmiissimapput, tassalu 11.8.2014-imit 21.8.2014-imut. Piffissami tassani [paaqqutarinnifimmit allamit] Angerlarsimaffinnillu Ikiorteqartitsivimmit periarfissaqarfiaatigut attartorniartarsimavugut, najugaqartut issiavinnik assakaasulinnik kaassuartakanik atuisut ingerlanneqassagaangata. Najugaqartut allat taxartittariaqartarsimavagut, ilaanneeriarlunilu aalajangiipallattoqartariaqartarsimaluni.

[Napparsimmavimmut napparsimmavimmillu] taxarnerit maani pineqartut taaneqartunut kingullernut ilaapput.

Tallimannngorneq 15.8.2014 nal. 11:18 (50,00 kr.-t) aamma ataasinngorneq 18.8.2014 nal. 10:34 (51,00 kr.-t)

Nassuiaatitaa qulaani taaneqartutorpiaq ippoq.

Arfininngorneq 30.8.2014 nal. 11:55 (81,00 kr.-t)

Taanna igaffimmi qulaani taaneqartutut aggeqqussisimanermet tunngasuulluarsinnaavoq, - tamannalu igaffiup pisortaata piffissami tassani feriarneranut ataneqarluarsinnaavoq. - Oqaatigineqartutulli oqaatigeqqinneqassaaq tamatuma angerlarsimaffimmiit paasiniarnera ajornakusoortuuvoq, - eqqaamasallu malillu-

git pisut katiterniaraluartillugit ilaruttoornarsigaluttuinnartarpoq. – Taxarnerulli sulinermut attuumassuteqarnera qularutissaanngilluinnarpoq.

Taakku tassaapput taxarnerit ataasiakkaat pillugit oqaaseqaatit.

Kommunip allagaani arlalitsigut oqaatigineqarpoq taxarkorti taamaallaat qaninnerpaatut pisortarisamit akuerineqarluni atorineqarsinnaasoq. Tamatumunnga atatillugu Utoqqaat Illuanni pissutsit piffissami kingullermi sivitsoqisumi qanoq inissisimanerat isiginiassallugu pingaartuuvoq. Pisut qanoq ingerlasimanerat kingumut isiginialaassallugu aamma pisariaqarpoq.

1987-imili – Utoqqaat Illuata utoqqaat illuannit nalinginnaasumit paaqqutarinnifimmut nutaaliaasumut ikaarsariarneranut atatillugu – kommunip Pisortat Isumaqatigiinniartartoqatigiivinit allagaani “Pisortaq A” aamma “Pisortaq B” taaneqarput – aallaqqaasiummilu taaneqartutut – “A”-p paaqqutarinninnermut akisussaaffik pingaarnertut tigummissavaa , “B”-llu (tassalu ataani atsiortup) allaffisornikkut aqutsineq akisussaaffigissallugu. Aaqqissuussineq taanna pisortatigoortumik akuerineqanngilaq, nalinginnaasumilli sulinermit suliassanik akisussaaffimmillu agguataarinermit tunngavik taanna erseqqissumik malinneqarsimavoq, [taamani pisortaasup] kingoraartaatalu qanittunnguakkut soraartup nalaanni.

Allaammi imaappoq pisortap kingulliup uangalu isumaqatigiissutigisimallugu ataatsikkut sapinngisamik feriarnaveersaartassasugut, - illumi ilisimasat, misilitakkat illulu pillugu ataatsimut ilisimasat tunngavigalugit aalajangiisinnaasumik peqartuarnissaa qulakkeerniarlugu.

Oqaatiginiarsarisara unaavoq suut pisariaqarnerat naleqquttuunerallu uannut namminermut annertooujussuarmik naliliiffigisassanngortinneqarsimasoq, - aamma taxartarnernut tunngasuni. Imaavipporlu ilanngussami 4-mi, kalaallisuaa ilanngullugu nassiunneqartumi, suliassaqarfimmi tassani malittarisassat uanga ukiorpassuit matuma siornatigut nammineq oqaasertalersugarikka.

Aallaqqaasiummili eqqaaneqartutut erseqqippoq akisussaaffimmik pinnaatitaanermillu agguataarineq ullumikkut allanngortiterujussuarneqalersimasoq, taamaalilluni uanga atorfiga “qullersariaannermi” samungangaatsiaq appartinneqarluni, immikkoortortaqarfinnili peqqissaasunik piginnaatitsineq annertusineqangaatsiaqaluni. Tamanna immini ajortortaqaqtariaqanngilaq, - isumaqaannartu-

ngaana taamatut ilusiliineq piffissami sivilisunerusumi ilisimaneqarsimasutut isik-koqartillugu iliuuseqarneq eqqortuunngitsoq. Tamakkumi qanittoralannguakkut aatsaat avammut nalunaarutigimneqarmata. – Allaammi tamanna sulisoqatigiik-kuutaanut tamanut erseqqissumik nalunaarutigineqarsimanersoq qularikuluppara.

[...]

Suliami matumani sordiaap pineqarnera eqqoriarnaveersaassavara, - kisianni Utoqqaat Illuanni aqutsinermik sulisoqarnermillu nutaamik ilusiliinermut uanga naleqqutinngitsunga isumaqartoqarsimappat tamatuma avammut nalunaarutigineqarsimanissaa erseqqissumik kissaatigigaluarpara – soorunalimilu ajornanngipat naapertuuttumik/naleqquttumik tunngavilersuutitalimmik.

[...]

Ukiuni 29-ni sulinera taamaallaat nersualarneqartarsimallunilu akuersaarneqartarsimavoq. Utoqqarnut tunngasuni ineriartortitsipiloornermi uummaarissumik peqataasimavunga, - najugaqartut apeqqutillu sulisoqarnermut tunngasut eqqarsaatigalugit, minnerunngitsumillu sanaartornermut tunngasuni, tassanilu suliasaqarfik pillugu ilisimasakka misilittakkakkalu assut tusaaniarneqarluarsimapput. – Immaqalu tamanit pingaarnepaatut, suliani assigiinngitsuni arlalippassuarini malittarisassanik ileqqussanillu aalajangersaanermi ukiuni tamani pingaarnertut suliniuteqartuusimavunga.

Tamakku tamaasa taxarnermik atornerluinikkut sooq aserorniassavakka? – Tamanna isumassaqaanngilaq.

Qulaani taaneqartut itisilernerqarnissaat kissaatigineqarpat ikiunnissannut soorunalimi piareersimavunga.” (Atorfeqarfimmi nutsigaavoq)

K Kommuni A peersinneqassasoq allakkatigut 10. oktober 2014-imeersutigut aalajangerpaa. Kommuni aalajangiinermi ilaatigut imatut allappoq:

“Matumuuna nalunaarutigineqassaaq pisortaqatigiit peersinneqassasutit aalajangiimmata.

Peersitsinissamik aalajangiineq matuminnga tunngavilersorneqarpoq, tassalu pi-sortaqatigiit ilimatsaakkaat piffissami 1. juni 2014-imit 30. august 2014-imut taxakorti 722,- kr.-t nalinginut atonerlussimagit. Akiligassiissutit nassuiaatitaanni erseqqissumik takuneqarsinnaavoq Utoqqaat Illuannut suliarlorlutit aamma angerlamut [angerlarsimaffimmut] taxartarsimasutit. Suliami illua'tungiusup isumaanik tusarniaatitut allakkani 24. september 2014-imi ullulerneqarsimasuni ilanngussamit 1-imit ilanngussamut 3-mut taxarsimanerit pillugit takussutissiat innersuussutigaaavut.

Pisortaqatigiit taxarsimanernik taxakortimik atonerluisimanermik ilimatsaassinissamut pissutissaqalersitsisunik nassaarsimanerat illit atorfeqartitaaninnut tunngasunik annertuumik/kusanaatumik unioqqutitsineruvoq. Taxakorti tatiginnineq tunngavigalugu atugassiissutaavoq, sulinermut atatillugu taxarnernuinnaq atorneqartussaq. [K Kommunip] taxakortia atorlugu namminerisamik ingerlaarneq atorfeqartitaaninnut tunngasunik annertuumik unioqqutitsineruvoq, taxakortimillu atonerluineq peersitsinermut tunngavissiivoq.

[K Kommunip] sulisoqarnek pillugu mappersagaanit makku erseput:

“Taxakorti taxabonillu taamaallaat suliassanut sulinermut attuumassuteqartunut atatillugu atorneqarsinnaapput. Tassa imaappoq suliassat qaninnerpaatut pisortarisamit suliassiissutigineqartut imaluunniit suliassat suliap pissusiata toqqaannartumik nassatarisai pineqartut. Aalajangersakkamik taassuminnga unioqqutitsineq atorfeqartitaasup atorfeqartitaaneranut tunngasunut ilungersunartumik kinguneqartinneqarsinnaavoq. Pisuni taxat atorneqarsinnaanerannik nalorniffiusuni qaninnerpaatut pisortarisaq akuersitinniaqqaarneqartariaqarpoq.”

Suliami illua'tungiusup isumaanik tusarniaassut sulisoqarnermut immikkoortortaqarfiup ilinnut 24. september 2014-imi nassiuppaa. Oqaaseqaatit sulisoqarnermut immikkoortortaqarfiup 6. oktober 2014-imi tiguaa, taannalu pisortaqatigiinnut saqqummiunneqarpoq, taamaalillunilu pisortaqatigiit suliamik naliliiviginninerannik allanngortitsinani.

Suliami illua'tungiusup isumaanik tusarniaanermut akissutinni ilaatigut imatut allapputit:

“Aallaqqaataaniilli oqaatigisariaqarpara Utoqqaat Illuanni kommunimilu ukiorpassuarni sulinera tatigeqatigiinnermik ataqqeqatigiinnermillu tunngaveqarluinnarsimammat, tassalu ilaatigut imaappoq taxakortit atugassiissutigineqartut torersumik aqunneqarnissaat pissusissamisoorsimalluni, - tamannalu ullumikkut uggoriinnarsinnaavara, tassami taxarnermi allattuiffivimmik uppernarsaasiussinnaasannik peqannginnama. – Taamaattumik nassuiaatima upperineqarnissaat aalajangiisuusorujussuuvoq, paasisariaqarlunilu taxakortimik atuisinnaanerup atornerlunnissaa soqutigisarinngilluinnarakku.”

Utoqqarnut Tunngasuni pisortaqatigiinni [taamani utoqqarnut tunngasuni pisortaasoq] qulaani taaneqartut pillugit imaattunik oqaaseqaateqarpoq:

“Suliami illua’tungiusup isumaanik tusarniaanermut akissutinni tikkuakkattut immikkoortorta qarfiit assigiinngitsut taxarnermut attuumassuteqarsinnaasut uppernarsaatinik pissarsiniarfigisimagaluarpakka. Taxarsimanitit pineqartut suliamik misissuininni uppernarsaatissarsinnaasimanngilakka. **Ilanngussaq 1** takuuk.

Suliami illua’tungiusup isumaanik tusarniaanermut akissutinni oqaluttuassartamut tunngasoq saqqummiussat tusaatissatut tiguneqarpoq, paasissutissallu allat taxarsimaninnut pineqartunut attuumassuteqanngitsutut isigineqarput, suliarlorlutit suliffinniillu angerlarlutit taxartarsimaninnut attuumassuteqaratic. Taxarsimanitillu taakku tassaapput pisortaqatigiit akuerinngisaat. Taamaattumik taxarsimanitit uppernarsaatitaqanngitsut inatsisinillu unioqqutitsinerusut suliffeqarfimmit akuerineqarsinnaannginnerat aalajangiusimavara, taxarsimanerillu taakku taxakortimik atornerluisimanertut pisortaqatigiit isigaat. Matumani ilassutigerusuppara immikkoortorta qarfiit tamarmik bussit amigaa-taatillugit najugaqartunik [Napparsimmavimukaassinissamut] taxakorteqarmata.”

Suliami illua’tungiusup isumaanik tusarniaanermut akissutimmi aamma allapputtit:

“Sapaat 1.6.2014 nal. 14:16 (81,00 kr.-t) aamma 1.6.2014 nal. 16:56 (81,00 kr.-t)

Tassani pineqartoq tassaavoq sulisut (sulinerminni piffissamik nalunaarsuinnermi) naqittagaannik taarsiineq taannalu naluneqanngitsutut akissarsianik

tulliuttuni tunniussinermi tunngaviusarpoq. - Naqitakkat qaammatit tamaasa taarserneqartarput, kortillu [...] (sulisut taartaasartullu) missaanniittut pineqarmata tamatuma periaaseq aalajangersimakkannersoq malillugu pisarnissaa pisariaqarpoq, malinnaasinnaajunnaarumangikkaanni. – Pisut ilaanni saapatit akunnerisa naanerini taamaaliortarpunga, - taamaattumillu taxarnej sulinermut attuumassuteqartutut isigisarlugu.”

Pisortaqatigiit tamanna pillugu imaattunik oqaaseqaateqarput:

“Sapaammi 1. juni 2014-imi na. 14:16 arlaatigut nalunaarsuisoqarsimangilaq. Sulisuvut [-ssasut] aalajangersarneqarsimavoq. Naqitakkat iluarsaakiartorlugit suliaartorniarnert tallimangornermi 30. majimi ilisimatitsissutigisimangilat.

Naalakkiutaasumik sapaammi sulisoqarnissaa pillugu uppersaataasinnaasumik nassaangilanga, soorlu qaammatini assigiinngitsuni ullunik suliffiusimasunik sanilliussinikkut, taamaattunimmi qaammatini allani takusassaqaangimmat. Isumaqaarpunga uanga illit pisortarisattut suliatit pillugit ilisimatineqartariaqartunga, sulissarlu naalakkiutigineqarsimangippat ulloq taanna taxarsimaneq apeqquserpara.”

Taxarsimaneq suliami illua'tungiusup isumaanik tusarniaalluni allakkani “1.6.-2014 nal. 17:19 [suliffimmit] taxarnej 83,- kr.” pillugu matumuuna naqqiuteqassaagut. Taxarnej illit suliami illua'tungiusup isumaanik tusarniaanermut akissutinni naqqiutigisattut tassaavoq “30.6.2014 nal. 17:19 taxarnej 83 kr.” Kukuneq ajusaarutigaarput.

Suliami illua'tungiusup isumaanik tusarniaanermut akissutinni 30. juni 2014-imi taxarsimaneq pillugu imatut allapputit:

“Qularutissaangilaq ataatsimiinneq sivitsortoortoq imaluunniit suliassaq alla piffissaq suliffiusoq nalinginnaasoq nal. akunneranik ataasimik qaangerlugu sivilissusilik pineqarsimassasoq. Pisumi tassani angerlamut taxarnissara akuerineqarsinnaasoq isumaqarsimavunga. Piffissap suliffiusup nalinginnaasup naanera pineqarsimasuuppat taamaaliorsimanaviangilluinnaraluarpunga, - kisianni killissat qanoq paasineqarnissaannik nassuiaaneq tikipparput. - Taxarsimanerli namminerisanut tunngasuunerassallugu suliamullu attuumassuteqaqnginnerassallugu eqqunngitsoq isumaqarpunga.”

Pisortaqatigiit qulaani taaneqartut pillugit imaattunik oqaaseqaateqarput:

“Ataasinngornermi 30.6.2014-imi nal. 17:19 taxarsimaneq. Ulloq taanna a-taatsimiinnerit peqataaffigisimanerakkatit pillugit uppernarsaatinik nassaarsinnaanngilanga, ullorsiutitsinnilu tamanna pillugu aamma takussitissaqanngilaq imaqarnilianilluunnit peqarani. Pisortatut ataatsimut ilinnut tikkuarlugu oqaatigissavara ataatsimiinnerup kingornatigut assigiinngitsunik pissuteqarluni qasusimagaanni angerlamut taxarnej aallaavittut nammineq akilerneqartussaammat. Taanna sulisitsisup akilissanngilaa.”

Suliami illua'tungiusup isumaanik tusarniaanermut akissutinni nangillutit imatut allapputit:

“Ataasinngorneq 21.7.2014 nal. 14:15 siumut utimullu (39,00 kr.-t) Taxarnej piffissap suliffiusup nalaaniippoq, najugaqartumillu kigutilerisuliaas-sineq allamulluunniit qanittumiittuliaassineq pineqarsinnaalluni. Taxarnej uanga nammineq inuuneqarninnut tunngasuunngilluinnarpoq, - tassungali tunngatillugu oqaatigineqarsinnaavoq pedeli ulloq taanna feriersimasoq, taamaattumillu ulapinnerusimallunga, tassami pisumi taamaattumi pedelip suliaasaanut akisussaaffik – eqqiaaneq ilanngullugu eqqarsaatigalugu – ingerlaannaq tigusarakku. – Aamma pisortaq pedelip toqqaannartumik qullersari-saatut suliasamik ingerlaannaq tiguisusasaariaqaraluartorluunniit. Pisortamilli oqartarnej oqaluttuaanngorsimavoq, taamanilu suliasanik assigiinngitsunik agguataarineq (immaqalumi aamma ullumikkut suli) erseqqissumik killissalersorneqarsimannngilaq. Suliasalli suliarineqartussaapput, - pisunilu taamaattumi ikiuunnissara tunuarsimaarfigineq ajorakku pisumi matumani taamaalorsimavunga (pedelip feriarnera tamaat).”

Utoqqarnut tunngasuni pisortaqatigiit taanna pillugu imaattunik akissuteqarput:

“Taxarsimaneq ataasinngornermi 21.7.2014-imi nal. 14:15-14:18-imi pisimavoq. Tassani suliasanik immikkoortortaqarfimmi nalunaarsorneqarsimasunik nassaarsinnaanngilanga. Tamatuma nalaani biilertoqarsimannngilaq, aamma-taarlu biilertoqarpugut peqquneqarnini malillugu aallertarlunilu aatsisartumik. Piffissap taamaalinerani uppernarsaatinik nassaassaqaanngilaq.”

Suliami illua'tungiusup isumaanik tusarniaanermut akissutinni nangillutit imatut allapputit:

"Arfininngorneq 26.7.2014 nal. 9:31 (79,00 kr.-t) aamma arfininngorneq 26.7.2014 nal. 10:03 (80,00 kr.-t)

Pisoq taanna pedelip feriarnerata suli nalaaniippoq, qularnanngilarlu Utoqqaat Illuannit aggeqqusisoqarsimasoq. Periarfissat eqqaariataarsinnaasakka pingasuupput (piffissaq aggeqqusiffiusoq eqqaamalluanngikkaluarlugu ilumut aggeqqusiffiusimasut), tassalu *oqilisaassisarfimmi qullit ajornartorsiutaanerat, oqaluttaatit ajornartorsiutaanerat, kiappallaalersimasoq igaffimmilu atugasamik aalajangersimasumik qitiusumi toqqorsivimmit inniminniisoqarnissaa tallimannornermi puigorneqarsimasoq.* – Oqaatigineqartutulli sorpiaat pineqarnera maannga angerlarsimaffinnit paasiniassallugu ajornakusoortorujusuuvoq."

Pisortaqatigiit taanna pillugu imaattumik akissuteqarput:

"Arfininngorneq 26.7.2014 nal. 9:31 aamma arfininngorneq 26.7.2014 nal. 10:03.

Pedeli 18. juli 2014-imit 4. august 2014 ilanngullugu feriarpoq. Pedelip feriarnerani taartaassasutit akisussaaffeqarfiiluunniit tigussagitit isumaqatigiissuteqartoqarsimanngilaq. Tamatumunnga atatillugu taxarsinnaasutit isumaqatigiissuteqartoqarsimanngilaq. Peqqissaasut angerlarsimallutik pigaartuusarput, paaqqutarinniffimmilu pisariaqartitsilerfikkut suliartoqqullugit aggeqquneqarsinnaallutik. Piffissami taaneqartumi oqilisaassivimmit ikiorneqarnissamik pisariaqartitsisoqarsimanersoq uppersaammik nassaarsinnaanngilanga, igaffimmi suliartoqquneqaratarsinnaallutilluunniit pigaartuussunik nalunaarsuiffimmi ullorsituniluunniit taamaattoqarsimanissaa takussutissaqanngilaq."

Suliami illua'tungiusup isumaanik tusarniaammut akissutinni nangillutit imatut allapputit:

"Sisamanngorneq 14.8.2014 nal. 11:02 (47,00 kr.-t) aamma sisamanngorneq 14.8.2014 nal. 11:42 (50,00 kr.)

Utoqqaat Illuata innarluutilinnut bussii piffissami sivisunerusumi biillieriffimmiissimapput, sulillu tassaniillutik. Utoqqaat Illuat aqqiissutitut bussinik [...mit] attartorsimavoq, taakkuli piffissami sivisukuluttumi aamma biillieriffim-

miissimapput, tassalu 11.8.2014-imit 21.8.2014-imut. Piffissami tassani [paaqqutarinniffimmit allamit] Angerlarsimaffinnillu Ikiorteqartitsivimmit periarfissaqarfiatigut attartorniartarsimavugut, najugaqartut issiavinnik assakaasulinnik kaassuartakkanik atuisut ingerlanneqassagaangata. Najugaqartut al-lat taxartittariaqartarsimavagut, ilaanneeriarlunilu aalajangiipallattoqartariaqartarsimaluni.

[Napparsimmavimmit Napparsimmavimmullu] taxarsimanerit pineqartut taaneqartunut kingullernut ilaapput."

Pisortaqatigiit taanna pillugu imaattunik oqaaseqaateqarput:

"Sisamanngorneq 14.8.2014 nal. 11:02 aamma sisamanngorneq 14.8.2014 nal. 11:42

Immikkoortortaqarfimmi peqqissaasut oqaloqatigaakka, taakkulu illit taxakortit najugaqartunik angallassineq eqqarsaatigalugu atorsimanngilaat. Taxa najugaqartunik assakaasulinnik kaassuartakkanik issiavillinnik angallassinermi atornerarsinnaanngilaq, tassami innarluutilinnut bussini ikiuisartut atuisunut taakkunungarpiaq atugassatut [paaqqutarinniffimmit allamit] atorfinitsinneqarsimammata.

Paaqqutarinniffimi sulisut piffissami tassani taxarlutik angallassisinnaanerit pillugu aamma isumaqatigiissuteqartoqarsimanngilaq, immikkoortortaqarfiullu taassuma piffissami tassani taxartarsimaneranut uppernarsaatilik aamma peqanngilaq.

Immikkoortortaqarfiup pisortaata [...-p] 5. august 2014-imi angerlartippaatit, stressernerit pissutigalugu. Tamatuma saniatigut ilinnut paasissutissiissutigisinnaavara Utoqqaat Illuanni allaffimmi assistentip [...-p] nalunaarutigigaa piffissami 5. august 2014-imit 11. august 2014 ilanngullugu napparsimasutut nalunaarsimasutit. Piffissami siuliani taaneqartumi arlaleriarlutit nakorsiartarsimavutit nakorsaaseriviliartarsimallutillu. Nakorsiarninnut atatillugu taxartarsimanersutit nalunarpoq, tassami nakorsiarnissannut nakorsaataasiviliarnissanullu taxarnissamut akueritinniarlutit uannut toqqaannartumik saaffiginnissimannginnavit."

Suliami illua'tungiusup isumaanik tusarniaanermut akissutinni nangillutit imatut allapputit:

“Tallimannorneq 15.8.2014 nal. 11:18 (50,00 kr.-t) aamma ataasinngorneq 18.8.2014 nal. 10:34 (51,00 kr.-t)
Nassuiaatitaa qulaani taaneqartutut ippoq.”

Pisortaqatigiit tamanna pillugu akissutaat imaappoq:

“Tallimannorneq 15.8.2014 nal. 11:18 aamma ataasinngorneq 18.8.2014 nal. 10:34

Akissut siulianisut ippoq. Uppernarsarsinnaavara pisuni taamaattuni najugaqartunik taxartitsineq sillimmasiineq eqqarsaatigalugu illersorneqarsinnaanngitsoq, tassami innarluutilinnik biiliussinerit tamarmik inarluutilinnut bussinik ingerlatsisartunit ikiortaannillu ingerlanneqartussaammata.”

Taxarnerit pillugit nassuiaatit kingulleq imaappoq:

“Arfininngorneq 30.8.2014 nal. 11:55 (81,00 kr.-t)

Taanna igaffimmi qulaani taaneqartutut aggeqqussisimanermut tunngasuulluarsinnaavoq, - tamannalu igaffiup pisortaata piffissami tassani feriarneranut ataneqarluarsinnaavoq. - Oqaatigineqartutulli oqaatigeqqinneqassaaq tamatumanga angelarsimaffimmiit paasiniarnera ajornakusoortuusooq, - eqqaamasallu malillugit pisut katiterniaraluartillugit ilaruttoornarsigaluttuinnartarpoq. – Taxarnerulli sulinermit attuumassuteqarnera qularutissaanngilluinnarpoq. Taakku tassaapput taxarnerit ataasiakkaat pillugit oqaaseqaatit.”

Pisortaqatigiit taanna pillugu imaattunik oqaaseqaateqarput:

“Arfininngorneq 30.8.2014 nal. 11:55

Igaffiup pisortaa 1. september 2014-imit ferialerpoq. Igaffiup ullorsiutaanit ersepoq arfininngornermi qulaani taaneqartumi pedeli illilluunniit aggeqquneqarsimanersusi nalunaarsuisoqarsimanngitsoq.”

Suliami illua'tungiusup isumaanik tusarniaanermut akissutinni imatut allapputit:

“Oqaatigineqareersutut taxarnerit ataasiakkaanut suut pissutaanerannut eqqoqqissaartumik takussutissaateqanngilanga, taxarnerillu ataasiakkaarlugit 100 %-imik qularnaatsumik akissutissarsiniassaguma akissutit taamaallaat Utoqqaat Illuanni nassaarineqarsinnaapput, pisumilu matumani uanga mat-

tussaavunga. – Taamaattumik – aap, taava qanoq oqassaanga iliussaanga-luunniit?”

Pisortaqatigiit tamanna pillugu imaattunik oqaaseqaateqarput:

“Suliassanut atatillugu taxarnerit nalunaarsuineri allattaavinni allaffimmiit-tuni nalunaarsorneqassapput. Pisuni sulineri atatillugu pisariaqartuni ta-xarnerit suut pisimanersut tassani uppersarnerqarput.

Piffissat suliama illua'tungiusup isumaanik tusarniaaneq pillugu akissutinni taa-satit Utoqqaat Illuanni pisortaqatigiinnut, immikkoortortaqarfimmi peqqissaa-sunut allanulluunniit nalunaarutigineqarsimanatilluunniit akueritinniarneqarsi-mangillat.

Taxarnerit piffissami kingullerimi malunnartumik amerleriarsimapput, taa-maattumillu taxanik atuineq qullersaasup, pisortap [...-p] misissuiffigitissima-vaa. Tamanna tunngavigalugu paasivarput illit arlaleriarlutit taxartarsimasutit pisortaqatigiit naliliinerat tunngavigalugu sulineri attuumassuteqartutut i-sigineqarsinnaangitsunik. Suliartoqquneqarsimatinnani imaluunniit sulineri-mut atatillugu allanik isumaqatigiissuteqartoqarsimatinnagu naalakkiutigine-qartunilluunniit suliassaqartinnagu suliffimmit suliffimmullu taxarneq inerteq-qutaavoq.”

Pisortaqatigiit qulaani taaneqartut tunngavigalugit aalajangiipput ullumikkumiit peersinneqassaasutit, tassalu imaappoq akissarsiatit 10. oktober 2014-imi unit-sinneqartut, atorfeqartitaanerillu annertunerusumik periarfisseeqqinnani unitsin-neqartoq.

[...]” (Atorfeqarfimmi nutsigaavoq)

Ilanngussat marluk K Kommunip peersitsinissamik aalajangiineranut ilan-ngunneqarput. Allattuiffik “Utoqqaat Illuanni angerlarsimallutik pigaartuu-sartut suliartoqquneqaratarsinnaallutillu pigaartuusartut”-nik qulequtalik aalajangiineri ilanngussatut 1-itut ilanngunneqarsimavoq. Allattuiffik taanna assammik allataavoq inuillu piffissami 23. februar 2014-imit 21. juni 2014 ilanngullugu angerlarsimallutik pigaartuusartut suliartoqquneqaratar-

sinnaallutillu pigaartuusartut aqqinik imaqarluni. A-p aqqa allattuiffimmi allassimasunut ilaangilaq. "Pedelip ullorsiutai"-nik qulequtallip ulluni 29. august 2014-imit 31. august 2014-imut atuuttup assilinera arfininngorneq 30. august allaffigineqarsimangitsoq aamma "Igaffiup ullorsiutai"-nik qulequtallip assilinera arfininngorneq 30. august allaffigineqarsimangitsoq ilanngussatut 1-itut aammattaaq ilaavoq. Ilanngussami 2-mi ilaapput kommunip sulisoqarnermut immikkoortortaqaarfiata, utoqqarnut tunngasuni pisortap akissarsialeriffiullu A-p 2012-2014-imi feriarnera pillugu e-mailikkut allaffigeqatigiittarsimaneranni allakkat 9. oktober 2014-imeersut.

A K Kommunimut tamatuma kingornatigut allappoq. Allakkanit 14. oktober 2014-imeersumit makku erserput:

"Allakkani ukunani pingaarnerpaaq naatsumik oqaatigalugu tassaavoq peersitsisoqarnissaanik aalajangiineq akuerisinnaangikkiga.

Siullertut oqaatigereerpara taxarnerit tamarmik sulinermit attuumassuteqartut, tassalu uanga nammineq iluanaarniutiginnikkikka, - imaluunniit uanga nammineq inuuneqarninnut allatigut attuumassuteqanngitsut. – Oqaatigisinnaavara Grønlandsbankimi qaammagini pingasuni taakkunani uanga kontonni atuinerit naqitanngortinneqarneranni taxanut akiligassiissutit 19-it katillugit 1.401,00 kr.-nik aningaasartaqartut ilaammata.

Naak tamanna uppernarsaasersuinerit "killormut sammisutut" ikkaluartoq tamatuma manna ilimanarsisittariaqarpaa, tassalu suup suliamut attuumassuteqarnera suullu namminerisamik inuuneqarnermut attuumassuteqarnera uanga nalunnigilluinnariga. Taxakortip iluanaarniutigineqarnissaa siunertarivissimasuugukku taxarsimanertut nalunaarsorneqarsimasut uanga kontonniittut ikinnera laarsuusimassagaluarput.

Taxarnerit qaninnerpaatut pisortarisamit akuerineqartarnissaannik isuma paasiluarsinnaavara, ukiunili 29-ni pisortaqtigii ilaattut pisortamut toqqaannartumik akisussaaffeqartutut isigineqarsimanagera, allaallumi suliassaqaarfimmi tassani – taamatuttaarlu apeqqutini aningaasaqarnermut tunngasuni – nammineq aalajangiisariaqartarsimanagera isiginngitsuusaarneqarsinnaangillat. – Suliami illua'tungiusup isumaanik tusarniaanermut akissutinni oqaatigeriikkattut piffissami kingullermi suliassaqaarfippassuarni pisinnaatitaanermut tunngasuni annertuunik

allanngortiterisoqarlarsaq paasisimavara. Tamannali ima nutaajutigaaq tamanna piffissami taxarsarfiusarsimasumi suliluunniit ilisimaneqarani. Taamaattumik aamma isumaqarpunga suliassaqarfimmi tassani taama sakkortutigisumik iliuuseqarneq ingasaqisoq. Pineqartorpiarmi tassaavoq atorfitta imarisaasa pisinnaatitaanittalu assigiinngitsorpasuartigut nutaamik paasiniarnissaat. Oqaatigineqartutullu tamanna nutaajuvoq, mannalu tikillugu periaasiusumik malinninnera ukunilu amerlasoorpassuangortuni uannut naatsorsuutigineqartut tunngavigalugit iliuuseqarsimanera pissutigalugit avoqqaarineqarsinnaassagunangilanga.

[Utoqqarnut tunngasuni taamani pisortaasup] suliame illua'tungiusup isumaanik tusarniaanermut akissutikka pillugit oqaaseqaatai erseqqarluttorpaalussuarnik imaqarput, takkulu pillugit maani oqaaseqaateqassanngilanga, nalunaarsuiffittulli allattaavimmik sulinermut atatillugu taxarnerit tamarmik nalunaarsorneqarfissaannik allaffimmi peqarneranik oqarnera eqqunngilaq. – Biilertartoq biilernini pillugit allattuiffeqarpoq, taannali illup nammineq biilianik biilernerinnarnik nalunaarsuiffissaavoq.

Uannut pasilliutit sakkortoqalutillu uannut namminermt annertoorujussuarnik sunniuteqartunik kinguneqarmata – kiisalu namminerisamut tunngatillugu taxarnerit suliameullu atatillugu taxarnerit erseqqissumik immikkoortittarlugit isumaqartuaannarama – peersitsineq akuerisinnaanngilluinnarpara.

Suliame illua'tungiusup isumaanik tusarniaanermut akissutinni taamaassorisattut imaaginnannginnerpa isumaqartoqartoq uanga ilusilersuinermt nutaamut tassunga tulluanngitsunga, - aap, taava tamanna toqqartumik oqaatigigaanni pisisamisunnginnerluni, imaassinnaasimagaluarlunilu soraarnissamut aaqqiineq naammaginarpoq isumaqatigiissutineqartoq.

Pissutsit massakktut itsillugit eqqartuussissuserisoq suliamek naliliiviginnittusaq attaveqarfisariaqarpara, taavalu qanoq pisoqaqqissanersaq takujumaarparput." (Atorfeqarfimmi nutsigaavoq)

A tamatuma kingornatigut uannut allakkatigut 21. oktober 2014-imeersutigut naammagittaalliorpoq. A-p suliap ingerlasimanera naammagittaalliiummini allaaseraa, tamatumalu saniatigut ilaatigut imatut allalluni.

“[K Kommunimi] sulisoqarnermut immikkoortortaqrarfiup allagai 14-2-07-1570-imik normoqartut “Pineqartoq: Peersitsineq pillugu aalajangiineq”-mik qulequtaqartut 16.10.2014-imi tiguakka. Allakkani nalunaarutigineqarpoq pisortaqatigiit peersinniarlunga aalajangersimasut. Tunngavilersuut tassaavoq pisortaqatigiit “i- limatsaassimagaat” taxakorti qaammatini pingasuni (01.06.-2014-imit 30.08.-2014-mut) 722 kr.-nik nalilimmut atornerlussimagiga.

Allakkat 14-2-07-1490-imik normoqartut 24.09.2014-imeersut “Pineqartoq: Taxakortimik sulinermut attuumassuteqanngitsumik ingerlaartarsimanikkut atornerluisoqarsimaneramik ilimatsaassineq pissutigalugu peersitsissamaarneq pillugu tusarniaaneq”-mik qulequtallit tiguneqarnerat ullormik ataatsimik sioqqullugu [utoqqarnut tunngasuni taamani pisortamit nutaajusumit] ataatsimiigiaqquneqarpunga (immikkoortortaqrarfiimmi peqqissaasoq [...] aamma najuuppoq).

[Utoqqarnut tunngasuni taamani pisortaq] oqarpoq isumaginninnermik ingerlat-sivimmi pisortap peqqusimagaani oqaloqatigeqqullunga. Oqaloqatigiinnermut i-nerniliunneqarpoq matuersaatit assigiinngitsut (illup isaariaanut matuersaat, a-ningaasiviup matuersaataa, matuersaataasiviup matuersaataa il.il.) kiisalu taxa-korti brugsenimullu korti ingerlaannaq tunniutissagikka. Tamatuma kingornatigut aneqquneqarpunga suliunnaarsitatut. Tamakku tamarmik pipput siumoortumik sumilluunniit piffissaliinani/mianersoqqusinani.

Allakkat pasilliutaasunik pineqartunik taaguiffiusut taneqartut aqaguani tiguakka.

Allakkanit taakkunannga ersertutut suliame illua'tungiusup isumaanik tusarniaa-nermut akissuteqarnissamut 8. oktober piffissalliunneqarsimavoq – piffissalius-saq naammaginaruugaluarpormi, suliffimmit mattunneqarsimanngitsuuguma taamaattumillu pasilliutit pineqartut “paasiniarnissaannut” mattunneqarsiman-ngitsuuguma. Taamaattumik akissutiga eqqaamasinnaasannik tunngaveqartaria-qarpoq, taamaalillunilu tamatuma nassatarisaanik erseqqartuuttortarpassuaqas-salluni. Suliame illua'tungiusup isumaanik tusarniaanermut akissummi aamma al-lappunga taxarnermut allattuivimmik peqarsimanngisaannartunga, taxakorti-mimmi paarsaqartitaaneq tatiginninnermik tunngaveqartoq taamaattumillu soo-runalmi atornerlunneqassanngitsoq isumaqartuaannarama. Tamanna sianiillior-tumik isummersimanertut ullumikkut isigineqarsinnaavoq, soorunalumi tamanna peqqissimissutigaa. – Suulli tamaasa imaaliillaannaq mumittutullusooq periar-lugit taxartarsimanerup sulinermut attuumassuteqanngitsutut taaneqarnera –

”peqqusersusaarluinnartumik” paasinninnertut uanga taarusunneruavara, uanga soorunalimi akuersinnaanngilluinnagara. Taxartarsimanernillu tunngaveqarniarneq inummik arlaanik pissuteqarluni soraarsikkusutamik peersitsinermi ”oqinaarinnilluni” iliuitsitut uanga pissusiviusut aallaavigalugit taamaallaat oqaatigisinaavara.

Suliami illua’tungiusup isumaanik tusarniaanermut akissutinnit ersertutut isumaqarpunga taxarsimanerit taaneqartut inummut namminermt tunngasuusutut sulinernulluunniit attuumassuteqanngitsutut taaneqarsinnaanngitsut. – Nassuerutigissavarali pisuni marlussunni killissarpiamiittoqarsinnaasoq siusinnerusukktu eqqarsaatigeqqissaarsimanngisannik, - uannullu aamma uparuarneqarsimanngisaannartunik. Ullup suliffiusup sivitsorujussuarneqarata kingornatigut angerlamut taxarneq, sapaatit akunnerata naanerani naqittakkanik taarsiinermt, suliffiit pillugit allattukkanik piareersaanermut il.il. atatillugu (nal. akunnerini pingasuni angerlarsimaffimmi sulereerluni), ok, tassani piffissap suliffiusup qanoq nasuiarneqarnera aalajangiisuussagunarpoq. Tamanna suliamut attuumassuteqannginnerarneqassappat namminerlu iluanaarniutaanerarneqassappat isumaqartuarpunga taamaaliorneq tunngavissaaleqqissunnassaqqisoq. – Qanorluunniilli pisoqaraluarpat taamatut pasitsaassinerup/oqarnerup uparuaaneq/mianersoqqusineq malitsigisariaqaraluarpa, tamannalu soorunalimi tusaatissatut tiguneqartussaavoq.

Peersitsineq iliusaavoq sakkortoorujussuaq, maani pisimasutut taama suunngitsigisunik, tassalu ”ilimatsaassineq”-mik, tunngavilersugaasinneraa takorloorsinnaanngisara.

[...]” (Atorfeqarfimmi nutsigaavoq)

Atorfinitsitsinermi allakkat, atorfeqartitaanermi pissutsit allannguutaat pissutigalugit atorfinitsitsinermi allakkat nutaanerusut kingusinnersumeersut, K Kommunip suliami illua’tungiusup isumaanik tusarniaalluni allagai, A-p taanna pillugu oqaaseqaatai kiisalu K Kommunip intranetsianeersup (...) naqitanngortinneqarnera. Naqitanngortitamit tassannga erserpoq K Kommuni intranetsimini 10. oktober 2014-imi imatut allassimasoq:

“Taxakortit pillugit malittarisassat sulisoqarneq pillugu quppersakkami erseqqis-sarneqarput. Siunissami imatut allassimasoqassaaq:

“Taxakorti taxabonillu suliassanik sulinermut attuumassuteqartunik suliarin-ninnermut atatillugu taamaallaat atorneqarsinnaapput. Tassa imaappoq su-liassat qaninnerpaatut pisortarisamit suliassiissutigineqartut suliassalluunniit suliap suussusiata toqqaannartumik nassatarisai pineqartut.

Aalajangersakkamik matuminnga unioqqutitsineq atorfeqartitaasup atorfeqar-titaanernut tunngasutigut ilungersunartunik kinguneqartinneqarsinnaavoq. Pi-suni taxat qaqugukkut atorneqarnissaannik nalorniffiusuni qaninnerpaatut pi-sortarisaq akuersitinniaqqaarneqartariaqarpoq.”

Qullersaqarfiup malittarisassanik erseqqissaaniarluni toqqaaneranut pissutaasq tassavaoq suliari ataasiakkaani sulisut taxakortimik namminerisaminnut tunnga-sunut atuisarsimanagerat.” (Atorfeqarfimmi nutsigaavoq)

A-p oqaaseqaatini amerlanerusut uannut allakkatigut 2. november 2014-imeersutigut nassiuppai. Allakkanit taakkunannga ilaatigut makku erseerput:

“Suliamut peersitsinermit tunngasumut uiggiussatut allakkat “Oqarasuaatikku-t sianertarnitit unitsittariaqarpatit”-mik qulequtaqartut [K Kommunimit] aatsisar-tutigut 31. oktober 2014-imi tiguakka. Allakkat assilinerannit ilanngullugu nas-siunneqartumit ersertutut allakkat [utoqqarnut tunngasuni taamani pisortamit] atsiorneqarsimapput.

Allakkat imarisaat pillugit tupigusuttorujussuuvunga, tamanna soorunalimi nas-suiarneqartariaqarpoq, nassuiaallu taanna matumuuna saqqummiukkusuppara.

Kommunip suliari peersitsinermit tunngasumi aalajangiinera 10. oktoberimi ti-gugakkuli nalinginnaasumik illoqarfimmiinninni siusinnerusukkuq suleqatigisima-sakka naapittarpakka, taakkulu tamarmik qanoq innersunga apeqqutigisarpaat. Pisuni tamani paasinarsisarpaq suliunnaarninnut pissutaasumik eqqunngitsumik nassuiaanneqartarsimasut. Tamarmik oqaatigisarpaat napparsimasunga tusarsim-agitsik, - arlallillu tusarsimallugu sivisuumik napparsimariarlunga ingerlaannaq soraarninngortussaasungagooq. Peersitsinerup pineqarpiarluna ataasiinnaalluun-niit naluaa. Suliap ingerlanerani ataasiarlungalaluunniit napparsimasimannnginna-

sulisut ataatsimut eqqunngitsumik ilisimatinneqarsimasut inerniliutiinnarsinnaavara.

Tamanna annernarpat annernanngipalluunniit imaappunga eqqortoq tamatigut salliutinneqartariaqartutut isigigiga. Taamaattumik pisumi tamani "taxakortimik atornerluisoqarneranik ilimatsaassineq" pissutigalugu peersinneqarnerisimammanerani oqaluttuarisarpa. Aammattaaq tamatigut oqaatigisarpara isumaqartunga eqqunngitsumik ilisimatinneqarsimammanerat pitsaanngitsuusoq.

Tamatumunga peqatigitillugu qinnuigisarpakka suleqatitik inuulluaqquteqqullugit, uangalu eqqarsaatigalunga eqqortoq oqaluttuareqqullugu, - tassalu napparsimaneq pineqarani peersitsineq pineqartoq.

Taamatut naapitaqartuaannalerama igaffimmi pisortaq, eqqiaanermi ukiorpasuarni sulisuusimasoq (pedeli eqqiaanermi pisortaq nutaaq ilisarimannnginnakku) kiisalu peqqissaasoq (piffissami kingullermi allannguuterpassuit pissutigalugit immikkoortortaqaarfimmi peqqissaasuugallarunartoq) oqarasuaatikkut (sianerfigisarlugit) attaveqarfigaakka. – Pisuni pingasuni taakkunani tamani assigiimmik akisoqartarpoq, tassalu paasitinneqarsimallutik piffissami sivisuumi napparsimammanerani kingornatigut soraarninngorniartunga. – Siuliani oqaatigeariikkattut eqqortoq oqaluttuarisarpa, - suliarlu matoorniarlugulusooq – toqqaannartumik salluliortoqarsimammanerani ilumoorlunga kamaatigaara (sulilu kamaatigalugu).

Oqarasuaatikkut sianernerit taakku siusinnerusukkut suleqatigisimasanut inusiarnersumik uannit, aammali [siusinnerusukkut pisortaasimasumit] ukiumi arlaqartuni ulluunerani atuisutut sulisunut assigiinngitsunut attaveqarlualersimasumit inuulluaqqusiniarnertut siunertaqarput. – Paasilluinnarparalu pingasut taakku eqqortumik nassuiaanneqarnertik assut nuannaarutigigaat.

Tassa imaappoq oqarasuaatikkut nammineq sianerfiginninnerit pingasut pineqarput, "utoqqarnut tunngasuni pisortap" assut kamaatigisai malersuinertullu taasai, imaassimagunarporlu sulisut politiinut nalunaarutiginneqqullugit kaammattorneqarsimasut.

Imatut apererusussinnaavunga: Suliami matumani nuanniitsorujussuarmi kinarpiaruna malersorneqartoq? – Pisortaqatigiillu suliap taamaaliornikkut ajornan-

nginnerpaamik nipangiunneqarsinnaanera ilimagigamikku ilumut toqqaannartumik salluliorsinnaappat?

Puigugaqarumananga oqaatigissavara suliffeqarfiit marlussuit aamma oqaluttuummannga Utoqqaat Illuannut saaffiginninnerminni paasitinneqarsimallutik napparsimasunga. – Pisuni aamma taakkunani suliap qanoq innera eqqortumik oqaluttuaraara. Siusinnerusukkut suleqatigisimasama pinerattut suliffeqarfiit taakku tapersersuinerat qanorlu pisoqarsimaneranik tupigusuutiginninnerat misigaara.

Kiisalu oqaatigissavara taamani (24.9.2014-imi) [utoqqarnut tunngasuni taamani pisortaasup] angerlartimmangali Utoqqaat Illuat ataasiarlungaluunniit pulaarfigisimanngikkiga. Tassalumi mailit allagaatillu qarasaasiamiittut – pappiararpassuillu angerlartinneqarama qimaannartariaqarsimasakka - misissoriartoqqullugit pisortaqatigiinnit neqeroorfigineqarsimanngisaannarpunga.

[...] (Atorfeqarfimmi nutsigaavog)

K Kommuni A-mut allagai 31. oktober 2014-imeersut A-p allagaanut ilanngullugit nassiunneqarput.

K Kommuni suliaq pillugu oqaaseqaateqaqqullugu allakkatigut 12. november 2014-imeersutigut qinnuigaara. K Kommuni tamatumunnga peqatigitillugu qinnuigaara suliami allagaatinik A-p allagaani 21. oktober 2014-imeersuni ilanngussartalinni aamma 2. november 2014-imeersuni ilanngussartalinni ilaanngitsunik peqarpat taakku uannut nassiuteqqullugit.

K Kommuni qinnuigaara oqaaseqaammuni manna pillugu nassuiaateqaqqullugu, tassalu A-p aalajangiinermi 10. oktober 2014-imeersumi allaaserineqartutut taxarsimanermigut pineqartutigut taxakortimik atornerluisimaneranik ilimatsaassinermik qulaajaaniarluni suliamik paasissutissartalersuinnermini kommuni sunik iliuuseqarsimanersoq.

K Kommuni aamma qinnuigaara oqaaseqaammuni manna pillugu nassuiaateqaqqullugu, tassalu A-p suliami illua'tungiusup isumaanik tusarniaanermut akissummini 6. oktober 2014-imeersu-mi tassungalu malitsigititatut allak-

kamini 14. oktober 2014-imeersuni atorffimmini pissutsit immikkut ittut tikkuagai kommunip qanoq sunniuteqartillugit isiginiarsimanerai, matumani A-p Utoqqaat Illuanni ukiuni 29-ni atorfeqartitaasimanera ukiunilu arlalissuarni pisortap saniatigut suliffeqarfimmi allaffissornikkut aqutsinermik sulinermi akisussaasusimanera ilaatigullu suliffeqarfiup taxakortinik atuineq pillugu tunaartarisassanik oqaasertalersuineranik siusinnerusukkut isumaginnittuusimanera ilanngullugit eqqarsaatigalugit.

Kiisalu K Kommuni qinnuigaara oqaaseqaammimi manna pillugu nassuiaateqaqqullugu, tassalu kommunip sulinermit atatillugu unioqqutitsinertut pasitsaassinerup annertussusia eqqarsaatigalugu sunik isumaliutersuuteqarsimanersaq, kiisalu A eqqarsaatigalugu qisuariaammik toqqaaneq pillugu kommunip sunik isumaliutersuuteqarsimanersaq, matumani qisuariaatinik peersitsinermi sakkukinnerusunik akuliuffiusunik allanik isumaliutersuuteqarsimanersaq ilanngullugu eqqarsaatigalugu.

K Kommunip akissutaa allakkatigut 9. marts 2015-imeersutigut ilanngussartalitsigut tiguara. Makku kommunip akissutaanit erserput:

“Ombudsmandip suliaataata [A-mut] tunngasup taama sivistigisumik suliarineqarnera [K Kommunip] aallaqqaasiutitut ajuusaarutigissavaa.

Suliami pissusiviusut pisimasullu tullerriaarneri pillugit matumuuna nassuiaateqassaagut. Tassani “sulinermit atatillugu biilerneq”-mik oqartarneq nassuiaassarput. Taava [A-p] ingerlaannartumik atuutilersumik soraarsinneqarnissaanik pisortaqtigiit aalajangiinerannut tunuliaqutaasoq pillugu nassuiaateqassaagut. [A-p] peersinneqarneranut atatillugu kommunip sunik isumaliutersuuteqarsimanera pillugu naggataatigut oqaaseqaateqassaagut.

Nassuiaatip aallartinnginnerani malugeqqussavarput suliami illua'tungiusup isumaanik tusarniaalluni allakkat allakkallu soraarsitsisutit oqaasertalersugaaneri erseqqarlummata paatsoortitsisinnaallutillu. Erseqqissarneqassaaq “taxakortinik atornerluisoqarneranik ilimatsaassineq” pineqanngimmat, pisortaqtigiilli paasininnerat unaalluni taaxakortit ilumut atornerlunneqarsimasut. Suliami illua'tungiusup isumaanik tusarniaalluni [A-mut] allakkanut 24.9.2014-imik ullulernerne-

qarsimasunut **ilanngussaq 1, tak. ilanngussat 1-3** (taxaatileqatigiiffiup naqitanngortitai) takuuk.

Ilanngussat taaguutaat paasiuminarsarniarlugit suliame illua'tungiusup isumaanik tusarniaalluni allakkanut ilanngussaq siuliani taaneqartoq ungaluuserlugu oqaatigineqartassaaq, Inatsisartulli Ombudsmandiannut oqaaseqaammut ilanngussat ungaluuserneqartassanatik.

Taxartarsimanerit [A-] piffissami 1.6.2014-imit 30.8.2014-imut taxartarsimanera pillugu naatsorsuutit misissuinnikkut uppersarnarparput. Aningaasaqarnermut allattoqarfik naatsorsuutit pillugit paasissutissanik saqqummiussivoq, tassalu Utoqqaat Illuata (UI-p) taxanik atuinera pillugu taxaatileqatigiiffiup naqitanngortitaanik saqqummiussilluni. **Ilanngussaq 1** innersuussutigeqqipparput.

*19.09.2014: [...] Ingerlatsivimmi pisortaqatigiit ataatsimiinnerisa kingornatigut: [...] Ingerlatsivimmi pisortap [...] -p] pisortaqatigiit ataatsimiinnerisa kingornatigut utoqqarnut tunngasunut pisortamut [...] -mut] malugeqqullugu oqaatigaa taxanut akiligassiissutit assilineri taxaatileqatigiiffimmit tigusimagini. **Ilanngussaq 2** takuuk ([utoqqarnut tunngasuni taamani pisortaasup] 2014-imi septemberimi Outlookimi ataatsimiinnissamut pilersaarutai).*

Taxakorti kia tigummineraa, matumani taxarsimanerit atuinerlu ilanngullugit eqqarsaatigalugit, tamanna pissutigalugu misissorneqalissaaq, tassami paaqqinnifiup namminerisaminik innarluutilinnut busiutillip atuinera qaffasippallaartutut isigineqarmat. Misissuinnermi tassani paasisat takutippaat taxanut akiligassiissutit siuliani taaneqartut [A-mut] toqqaannartumik attuumassuteqartut takuneqarsinnaasoq, tassami taxakorti [...] -mik] normulik taamaallaat [A-mit] atugassatut tunniunneqarsimammat tassanngalu atorneqarluni. **Ilanngussaq 3 takuuk** (Taxakortit UI-mi atorfeqartitaasunut tunniunneqarsimasut pillugit takussutissiaq, matumani taxakorti [A-mut] tunniunneqarsimasoq ilanngullugu eqqarsaatigalugu).

24.9.2014 nal. 9:50:

[...], taamani utoqqarnut tunngasunut pisortaq ataatigut atsiortumut e-mailerpoq apeqqutigalugulu [A-p] taxakortimik atornerluinera pillugu qanoq iliussanerlutik. [...] Ingerlatsiviup pisortaata [...] -p] suliaq missingiussilluni taamanili naliliiffigereersimavaa, oqarsimallunilu [A-p] soraarsinneqarnissaa kissaatigini.

Ilanngussaq 4 takuuk ([utoqqarnut tunngasuni taamani pisortaasup] ataani atsiortumut 24.9.2014-imi nal. 09:50-imi e-mailia).

24.9.2014 nal. 10:04:

Allakkiami utoqqarnut tunngasuni taamani pisortaasup [...]p] suliarisaani taanna allappoq [A] taassuma taxanik atuinera pillugu ataatsimeeqatigisimagini, piffissallu taxarfiusarsimasut suliffiup aallartinnerinut naanerinullu sanilliullugit tassunga saqqummiussimagini. [...]mik] Ingerlatsiviup pisortaata [...]p] oqaatigeqqippaa [A-p] soraarsinneqarnissaa kissaatigigini, [utoqqarnullu tunngasuni taamani pisortaasooq] sulinermut atatillugu pineqaatissiinissamut periarfissanik Sulisoqarnermut Immikkoortortaqarfimmut paasiniaatissimallugu. **Ilanngussaq 5** takuuk (Allakkiaq [utoqqarnut tunngasuni taamani pisortaasooq] atsiorneqarsimasooq, "Taxakort misbrug"-imik qulequtalik).

Kommuni taxartarsimanerit sulinermut atatinnagu pisarsimanersut qulaajarniarlugu paasissutissartalersuiniarluni qanoq iliuseqarsimanersooq nassuiaaqqusilluni Ombudsmandip qinnutigisaa eqqarsaatigalugu makku ilanngullugit isiginiarneqassapput.

[A] [...]tut] atorfimmi atorfeqartitaasimavoq, taxarnissamut killilimmik pisariaqartitsiviusumi. Taamaalilluni ataatsimiinnissat siunnersortitulluunniit suliassat piffissani taxarfiusimasutut nalunaarsorneqarsimasut nalaanni taxartariaqalersitsisut suliarineqarnissaat aamma isumaqatigiissutigineqarsimanngilaq.

UI-mi sulinermut atatillugu biilernerit suut sulinermut atatillugu biilernertut isigineqarnerisa sukumiinerusumik nassuiaaqquneqarnerat erqarsaatigalugu utoqqarnut tunngasuni pisortaasooq oqarpoq ulluinnarni sulinermut atatillugu biilernerit annertuujunngitsut (tassani **ilannngussaq 5** takuuk), tassami pedelearatta innarluutillit bussiinik ingerlaartartumik taamaalillunilu ulluinnarni atuisunik ator-tussanillu nalinginnaasunik ingerlassisartumik.

Inatsisartut Ombudsmandiat aammattaaq allappoq oqartussaasup pissusiviusut pillugit paasissutissanik inatsiseqartitsinermi tunngavik pineqartoq eqqarsaatigalugu aalajangiinissamut pisariaqartunik peqarnissani pissusiviusullu pillugit paasissutissat taakku naammattumik qularnaatsuunerat qulakkiissagaa.

Tamanna pillugu oqaatigineqarsinnaavoq taxaatileqatigiiffiup UI-mi taxartarsi-manernut assigiinngitsunut takussutissatut naqitanngortitai ullulersukkat piffis-sallu eqqortunik takussutissartallit [K Kommunimut] toqqaannartumik tunniun-neqarmata. Paasissutissanit taakkunanga pissusiviusut pillugit paasissutissat (K Kommunip) peersitsissamaarnermik aalajangiineranut tunngaviusut takuneqar-sinnaapput. Taxarsimanerit sulinermut atatillugu pisimanagerat utoqqarnut tun-ngasuni pisortaqaatigiinnit ilumuunnginnerarneqarpoq, [A-mi] siusinnerusukkat oqaatigineqartutut allaffimmiinnerusarmat sulillunilu, UI-p avataani allanut inger-lasarnissaq killilimmik pisariaqartittarlugu.

Sulisoqatigiit sulinermut atatillugu taxanik atuisuunerusut tassaapput napparsi-masunik paaqqutarinninnermut tunngasuni angerlarsimallutik pigaartuusartut, aggeqquneqarunik aggernissaminnut pissusaaffeqartut, piffissallu suliffiusup na-linginnaasup avataatigut aggeqquneqarsinnaasut. Tamatumunnga atatillugu aamma erseqqissaatitut oqaatigineqassaaq UI-mi biilertartoq utoqqarnik najuga-qartuinnarnik illoqarfimmut allamukarnissaminnik pisariaqartitsisunik ingerlassi-nissamut akisusaaffeqarluni atorfeqartitaammat, taakkulu tassaagajuttarlutik nakorsiarnerit illulluunniit avataani ingerlatat allat. Biilernerit taakku "sulinermut atatillugu biilerneq"-mik nassuiaammi pineqartunut ilaatinneqarput, biilertormi pissusaaffeqarmat najugaqartut pisariaqartitaat isumagissallugit, aatsaallu biiler-toq piffissaqanngippat najugaqartut eqqarsaatigalugit taxat atorneqarsinnaallu-tik.

[A] suliame illua'tungiusup isumaanik tusarniaanermut akissummini 6.10.2014-imi ullulernerqarsimasumi allappoq qasoqqagaangami UI-p taxarkortia atorlugu angerlamut taxartarluni. Taxarnerit taakku sulinermut atatillugu taxarnertut isi-gineqarsinnaanngillat, ilaatigut piffissap suliffiusup avataatigut pisaramik ilaati-gullu taamatut taxarnerup siunertaa sulinermut atatillugu biilernermut nas-suiaammi pineqartumut ilaanngimmat, **ilanngussaq 6** takuuk ([A-p] suliame il-lua'tungiusup isumaanik tusarniaanermut akissutaanut Amalie Pedersenip allak-katigut akissutaa 8.10.2014-imi nal. 15:41-mi ullulernerqarsimasoq, e-mailikkut nassiunneqartoq) kiisalu **ilanngussaq 7** (allakkiaq [utoqqarnut tunngasuni taa-manip pisortaasumit] 8.10.2014-imi atsiorneqarsimasoq igaffiup, pedelip kiisalu angerlarsimallutik pigaartuusartut aggeqquneqarsinnaallutillu pigaartuusartut ul-lorsiutaat pillugit ilanngussaq).

[A-p] ukiorpassuarni pisortap saniatigut aqutsinermi akisussaaffimmik tigum-miaqarsimanera taxakortinillu atuineq pillugu tunaartarisassanik oqaasertalersui-suusimanera, **ilanngussaq 8** takuuk (UI-mi taxakortinik atuineq pillugu tunaar-tarisassat, tak. suliami illua'tungiusup isumaanik tusarniaalluni allakkat 24.9. 2014-imi ullulerneqarimasut kalaallisuinnaq [A-mut] nassiunneqarsimasut) pis-sutigierpiarlugu kommunip manna erseqqissumik naatsorsuutigisimavaa, tassalu sulinermut atatillugu taxarneq aamma sulinerup avataatigut taxarneq [A-p] im-mikkoortisimassinnaassagai. Taxartarsimaneq pillugu paasissutissat pisortaqa-tigiinnit tiguneqarmmata iliuseqarsimanerlu peqquserlussimanertut atorfeqarti-taanermullu tunngasunik annertuumik sumiginnaanertut isigineqarmat [A-mik] tatiginninneq tamatuma kingunerisaanik aserorneqarpoq – [...-tut] inissisimane-ra aamma isiginiarlugu. Taamaalillutik suliap ingerlanerani nalinginnaasumik pif-fissaliilluni soraarsitsisoqarnissaa aamma ingerlaannartumik atuutilersumik peer-sitsoqarnissaa isumaliutersuutigineqarsimapput. Sulinermut atatillugu sakkukin-nerusumik pineqaatissiisoqarnissaa eqqarsaatigineqarsimanngilaq.

Suliaq sulisumut [A-mut] tunngasoq nalinginnaasoq paasissutissanik Inatsisartut Ombudsmandiannut naammagittaalliummut imaaliallaannaq attuumassuteqar-tunik imaqaanngilaq, suliami illua'tungiusup isumaanik tusarniaalluni allakkat al-lakkallu soraarsitsissutit ilanngussartallit allakkanut ukununga ilanngussatut nassiunneqartut eqqaassanngikkaanni. Mappi suliami allagaatinik imalik sukumii-sumik misissorusussagussiuk Sulisoqarnermut Immikkoortortaqarfup piffissamik aalajangersimasumik isumaqatigiissuteqarfiginiarlugu attaveqarfiginissaanut ti-killuaqqusaavusi." (Atorfeqarfimmi nutsigaavoq)

Ilanngussat 1-imit 8-mut K Kommunip akissutaanut ilanngullugit nassiun-neqarput, kommunip akissutaani oqaatigineqartutut qulequtsersugaallutik. Ilanngussaq 4 tassaavoq utoqqarnut tunngasuni pisortap sulisoqarnermut immikkoortortaqarfimmut e-mailia 24. september 2014-imeersoq. Makku e-mailimit tassannga erserput:

"Ippassaq oqaloqatigivara [A], taxartarsimanera pillungu, nassuiaallugulu suut kingunerisinnagaai, ullaq [pisortarput] ilisimatippara.

Paasisakka malillungit qaamatini pingasuni, taxaqattaartarsinnoq suliffimiit angerlarsimaffimmut ullut sisamat, tallimallu akornanni qaammammut.

Qanoq iliuseqassuunga massakkut, aalajangerneqarmat [Pisortamit], soraarsin-neqassasoq. Allakkat ilinnut nassiuppakka kopiit, allakkakkalu biilertumut ilaatil-

lungit. Siunersulaarsinninga qanoq iliusasunga, angerlartissanerlungu [A] imaluuniit??”

Ilanngussami 5-imiipput utoqqarnut tunngasuni pisortap sulisoqarnermut immikkoortorta qarfimmut allagai 24. september 2014-imeersut. Allakkanit taakkunanga makku erserput:

“Pineqartoq: Taxakortimik atornerluineq

Pisortap [...-p] qinnuigaanga Utoqqaat Illuanni taxartarsimanerpassuit misissoq-qullugit.

Maani Utoqqaat Illuanni junip, julip augustillu qaammataanni taxarsimanernut akiligassiissutit tigummivakka.

Akiligassiissutini taakkunani takuneqarsinnaavoq [A] Utoqqaat Illuannit angerlamut Utoqqaallu Illuannut taxartarsimasoq, uangalu isumaqarpunga taxarnerit taakku inummut namminermut tunngasuusut.

[A] oqaloqatigaara, taannalu oqarpoq pedeli peqatigalugu suliartoqquneqaratarsinnaasutut inissisimalluni taamaattumillu ilaanni aggeqquneqaraangami agger-tarsimalluni! Aamma oqarpoq sapaatit akunnerisa naanerini allaffimmi sulisarlu-ni, taamaattumillu taxartarsimalluni.

Naak nalunngikkaluarlugu maani allaffimmi suliassarpassuaqangaanngitsoq, allaffimmimi aamma ikiortimik sulisoqarmat. [A] aamma oqarpoq ataatsimiinnerit sivitsortoorsimagaangata qasuallaaraangami angerlamut taxartarsimalluni.

Sakkortuumik erseqqissarpara namminerisanut tunngasut pillugit taxarnej akue-rineqarsinnaanngitsoq atornerluinertullu isigineqarluni! Akivaanga kommuni maani malittarisassanit allaasunik immaqa malittarisassaartoq!

Aamma oqarpoq imaassinnaasoq taxakortini sulisunit allanit atornejartarsima-soq!? Uannut paasiuminaaqaaq!

Pedelegarpugut suliartoqquneqaratarsinnaasumik, suliartoqquneqartarsinnaa-nermut tapisialimmik, taamaattumik Utoqqaat Illuanni allanik pisariaqartitsiner-

luta takusinnaanngilara. Aggeqqusisimanerit il.il. pillugit uppersaatit peqanngilaq.

Suliaq atornerluinertut isigaara, peqqissaasullu tusarniaavigalugit. Taakku oqarput qaqutigorujussuaannaq aggeqqusisoqartartoq, pedeli pissarsiarineqarsinnaanngikkaangat.

Taxartarsimanerit aamma sapaatit akunnerata qeqqaniipput ulluuneranilu!! Taxakortimik atornerluisimasut allat taamasa assigalugit kinguneqartitsisoqartariaqarpoq!

Taxakortit pillugit malittarisassaqarpoq, taakkulu [A-p] nammineq nalunngilai!

Pisortaq [...] isumasiorpara, taassumalu kaammattorpaanga taxakortimik atornerluineq pissutigalugu soraarsitsisoqarnissaanik inassuteqaasioqqullunga.

Sulisoqarnermut immikkoortortaqarfik qinnuiginiarpara suliame illua'tungiusup isumaanik tusarniaasioqqullugu kiisalu [A], inuttut normua [...] pillugu inassuteqaasioqqullugu." (Atorfeqarfimmi nutsigaavoq)

A-p suliame illua'tungiusup isumaanik tusarniaalluni allakkat 24. september 2014-imeersut pillugit oqaaseqaatai utoqqarnut tunngasuni pisortap sulisoqarnermut immikkoortortaqarfimmut allagaanut 8. oktober 2014-imeersunut ilanngussatut 7-itut ilanngunneqarput. Allakkanit taakkunannga makku erserput:

"[A-p] akissutaa eqqarsaatigalugu immikkoortortaqarfiit assigiinngitsut uppersaasiussaata pissarsiariniarpakka. Sunaluunniit uppersaaserneqarsimanngilaq. Assilillugu ilanngussa takuuk.

Qanga pisimasut allallu taxartarsimanernut angerlamullu biilertarsimanernut attuumassuteqanngillat, taamaattumillu biilersimanerit uppersaatitaqanngitsut inatsisunik unioqqutitsisuunerat paaqqinniffimmillu akuerineqarsinnaannginnerat aalajangiusimavara.

Taxartarsimanerit pisortaqatigiinnit taxakortimik atornerluinertut isigineqarput.

Maani ilanngukkusuppara immikkoortortaqrarfiit tamarmik najugaqartunik [Naparsimmavimmukaassinissamut] bussit atorsinnaanngikkaangamikkit taxakorte-qarmata.

Utoqqaat Illuata taxartarneq pillugu malittarisassaasa suliarneqarnerat [A-p] nammineq peqataaffigisimavaa." (Atorfeqarfimmi nutsigaavoq)

K Kommuniq oqaaseqaataa suliami illua'tungiusup isumaanik tusarniaatitut A-mut allakkatigut 13. marts 2016-imeersutigut nassiuppara.

K Kommuniq oqaaseqaataa pillugu A-p oqaaseqaatai allakkatigut 25. marts 2016-imeersutigut tiguakka. A taxarsimanerit ataasiakkaat pillugu allakkani oqaaseqaateqarpoq, ataatsimullu oqaaseqaatinik aammattaaq saqqummiussilluni. Allakkanit taakkunannga ilaatigut makku erserput:

"Suliaq manna tamarmi Utoqqaat Illuanni pissusiviusunik paatsuuineramik ilisimasagannginnermillu tunngaveqartuq isumaqarama misigisimavunga – suliap ilungersunassusia pissutigalugu – ataatsimut oqaaseqaatinik arlalinnik pisoq uanga isumaga malillugu nuanniitsoq naammaginangitsorlu uanga inissiffigisimasara pillugu qulaajaataalaarsinnaagunartunik saqqummiussinissaq pisariaqartuq.

Kommuniq allagaanit qulaani taaneqartunit erserpoq taxanik atuineramik misissuineq [...-mik] Ingerlatsivimmi pisortamit [...mit] aallartinneqarsimasoq.

Ataani atsiortup soraarsinneqarnissaanik [pisortap] kissaateqarnera – taxaatileqatigiiffiup naatsorsuusisaasa saniatigut – paasissutissanik [utoqqarnut tunngasuni taamani pisortaasumit] tiguneqarsimasunik taamaallaat tunngaveqarsorinarpoq. Sulisoqarnermut immikkoortortaqrarfiup paasissutissaatai taamaallaat paasissutissanik [utoqqarnut tunngasuni taamani pisortaasumit] pissarsiarineqarsimasunik aamma tunngaveqarsorinarput. Taamaattumik [utoqqarnut tunngasuni taamani pisortaasup] paasissutissiissutaasa eqqortuusimanissaat Utoqqaallu Illuanni pissutsinik iluamik paasisimasaqarnermik tunngaveqartuunissaat pingaartumillu ataatigut atsiortup atorfeqartitaanerani pissutsinik tunngaveqartuunissaat aalajangiisuulluinnartumik pingaaruteqarpoq. Immaqa aamma oqaatigisariaqarpara – pisortamit sulisoqarnermulluunniit immikkoortortaqrarfimmit - oqaloqatigineqarnissannut aggeqquneqarsimanngisaannarama.

Isumaqavippunga pasilliutit pineqartut pillugit isumaga pillugu siusinnerusukkut ersarissumik nassuiaateqareerlunga, taamatuttaarlu isumaqarpunga pisut ingerlasimanerat pillugu naatsumik nassuiaateqareerlunga pissusiviusumik matuminnga qulaajaasussamik, tassalu uanga atorfeqartitaanera (siullermik pisortamut erseqqinnerusumik nassuiagaanngitsumik [...-tut], tullianik [...-tut/...-tut kiisalu ...-tut]), [...-tut utoqqarnut tunngasuni taamani pisortaasumut] paaqqutarinnifimmi allami] ilisimasaanut imaaliannaq assersuunneqarsinnaanngitsoq. "A- torfiup suliallu allaaserineqarnerat" ilanngullugu nassiunneqartoq tassaaginnarpoq Utoqqaat Illuanni ukiorpassuit ingerlaneranni sunik suliasaqarsimaninnik akisussaaffeqarsimaninnillu takussutissiaq. Malugeqqullugu oqaatigissavara masakkut oqaasertalersorneqarnera taamaavinnikkaluartoq, kisianni tassaalluni taamani oqaasertalersueqqaarnermi ilusiliunneqartoq uanga qarasaasianni toqqortarisara. – Imarisaali eqqortuupput.

Tulliuttut suliamik tamarmiusumik nutaamik allaaserinninnerunngillat, tassaanerullutilli pissutsit siusinnerusukkut allagaasimasuni qaangiataaginnarneqarsimasut itisilerneqarnerulaartariaqartutulluunniit isigisakka pillugit ilassutaasumik oqaaseqaatit.

Siusinnerusukkut oqaatigineqartutut kommunip allagaani 10.10.2014-imeersuni (peersitsinissamik aalajangiinermut tunngasuni) immikkoortut ataasiakkaat pillugit tulleriarlugit oqaaseqaateqarsimanngilanga, oqaatigiinnarluguli erseqqarlutunik assigiinngitsunik imaqartut. Kommunip Ombudsmandimut allagai kingullit 09.02.2015-imeersut pillugit soorunalimi aamma oqaaseqaateqanngilanga. Imaanngitsoq nutaartaqanngimmata, taamaattorli pingaartumik ilanngussami 5-imi ("Taxakortimik atornerluineq pillugu" [utoqqarnut tunngasuni taamani pisortaasup] sulisoqarnermut immikkoortorta qarfirmut allagaani 24.09.-2014-imeersuni) paasissutissanik siusinnerusukkut ilisimaneqanngitsunik oqaaseqaateqarfineqartariaqartunik saqqummertoqarpoq. Ilanngussaq taanna ilaatigut paasissutissanik toqqaannartumik eqqunngitsumik imaqarpoq, tamannalu pitsaanngitsorujussuuvoq, minnerunngitsumik allakkat ulluata takutimmagu pisoq assut siusissukkut pilersimagami uanga inuttut sulisoqarnermut immikkoortorta qarfirmut tunngaviatigut kukkusumik nittarsaanneqarninnut pissutaaqataasimasinnaasoq.

Kommunip ataani atsiortumut allagai siulliit, tassalu allakkat 24.09.2014-imeer-
sut, kingumut uterfigigaanni taxarnerit tamarmik suliamut attuumassuteqanngit-
sutut isigineqarnerat eqqumiiginartorujussuuvooq, tassa suliartoqquneqaratarsin-
naallunga pigaartuuninnut atatillugu taxartarsimanikka isiginiangilluinnarlugit. –
Tassa imaappooq kommunip paasinninnera imaaliallaannaq allangorluinnarsima-
soq, ukiorpassuit ingerlaneranni tatigeqatigiinnermit takorloorneqarsinnaasut
qaangerlugit tatiginninnginnermut. Taxartarnerit siusinnerusukkut oqaaseqaate-
qarfigineqareerput, marlussunnilli ilassutaasunik oqaaseqaateqarnissaq immaqa
pissusissamisoorinnaavoq.

Allakkat aallaqqaataanni allaasimavoq “Aningaasartuutit nassuiaataanni erseq-
qissumik takuneqarsinnaavoq Utoqqaat Illuannut suliarlorlutit aamma [angerlar-
simaffinnut] angerlarlutit taxartarsimasutit.”

Tassani imatut oqarusunnarsinnaavoq: Qanormi allassimasasagaluarami? – U-
toqqaat Illuanni suliaasaqarluni suliartoqquneqaraanni angerlarsimaffittut najuk-
kap Utoqqaallu Illuata aningaasartuutit nassuiaatitaanni allassimanagerat tupaal-
laatissarujussuunavianngilaq. Isumaqarpunga Utoqqaat Illuata angerlarsimaffit-
tullu najukkap taxaatileqatigiiffiup aningaasartuutitut nassuiaataanni allassiman-
nginnerat ajornartorsiutaalersimassagaluartooq. – Suliali qiterisaa arlaleriarluni
oqaatigineqartutut unaasorinarpoq suliartoqquneqaratarsinnaasutut pigaartuune-
rup Utoqqaat Illuanni ukiuni 29-ni tamani atorfeqartitaaninni uannut atuussima-
sup akueriومانeqannginnera.

Allakkat taakkua quppernerisa pingajuanni aallaqqaasiutitut allassimavoq: “Ta-
xartarsimanagerit pillugit nassuiaammi piffissatut allassimasut takutippaat sulif-
fimmur suliffimmillu taxartarsimasutit, taxarnernilu taakkunani sapaatit akunne-
risa naaneri suliffiulluunniit nalinginnaasup avataani piffissat pineqartunut ilaa-
tinneqanngitsut.”

Tamanna toqqaannartumik salluuvooq, tassami ullui qiviaannaraanni takuneqar-
sinnaammat taxarsimanagerit aqqanilinnit tallimani arfininngornikkut sapaatikku-
llu taxarsimanagerit pineqartut, taxarnerillu sinnerinit ataatsimi suliffiusup nalingin-
naasup avataani pisimanera erseqqilluinnartooq (- suliffiusooq nalinginnaasooq
8.00-imit 16.00-imut pisartutut nassuiarneqarpat).

Tamatuma Kingornatigut [K Kommunip] allagai 10.10.2014-imeersut "Peersitsinissamik aalajangiineq pillugu"-mik qulequtallit pillugit oqaaseqaateqassaanga.

Sulisoqarnermut immikkoortorta qarfirmut allakkanni 14.10.2014-imeersuni oqaatigisattut isumaqarpunga allakkat 10.10.2014-imeersut erseqqarluttunik arlalissuarnik imaqtartut, [utoqqarnut tunngasuni taamani pisortaasup] oqaaseqaataanut toqqaannartumik innersuussisunik. Allakkanni 14.10.2014-imeersuni oqaatigaara taakku pillugit imaaliallaannaq oqaaseqaateqarnissaq naleqqutinnigitsutut isigigiga, tassami kommuni peersitsisoqassasoq aalajangeereersimammat. – Oqaaseqaateqarnissamut taarsiullugu Ombudsmandimut saaffiginnippunga.

Massakkulli isumaqarpunga suliami immikkoortut assigiinngitsut sapinngisamik pitsaanerpaamik paasissutissartalorsorneqarsimanissaat pingaartuusoq, - tamanna uteqattaarinerpaalunnik nassataqassagaluarpalluunniit.

Kommunip "taxakortimik atornerluisoqarsimaneranik ilimatsaassineq"-mik oqarneq peersitsisoqarnissaanik aalajangiineq tikivillugu atorpaa. Taamatut oqarneq peersitsinermut sakkortoorujussuarmik akuliunnerusumut naapertuutinngilluinnarpoq. – Kommunilli Ombudsmandimut akissutaani takusinnaavara tamanna kommunip nammineq malugilersimagaa. Uannut suliami toqqaannartumik pineqartumut "ilimatsaassineq" kisiat atorneqarpoq.

Taxakortimik atuinnginninni akuersissummik pissarsiniarfigisassaginni [utoqqarnut tunngasuni taamani pisortaasup] assut pingaartillugu isiginiarpaa (sulisoqarnerlu pillugu mappersagaq innersuussutigalugu). Isumaqarpunga tassani ajornartorsiutaasoq Utoqqaat Illuanni ukiorpassuarni sulininni inissisimasimaninnik – tassalu pisortaqatigiinni naliigimmik inissisimaninnik – [utoqqarnut tunngasuni taamani pisortaasup] paasiuminaatsitsinerujussuanut attuumassuteqartoq. Minnerunngitsumik aningaasaqarnermut ataneqartillugu, tassami uanga ukiorpassuarni assut tatigineqarlunga inissisimasimagama, tamatumunngalu ataneqartumik annertuumik kiffaanngissuseqarsimallunga, pingaarutilinnillu aalajangiisoqassatillugu tamatigut isumasiorneqartarlunga. Taamatut akuersaarneq ataqqininnerlu taamani isumaginninnermi pisortaasup siusinnerusukkut oqaatigisattut inerititaqarfiulluurtumik suleqatiginerata nalaaniilli pilersimavoq. Taamatut suleqatigiinnermi taamani immikkoortorta qarfiit pisortaat pisortaanerlu ilaapput.

Taxakorti eqqarsaatigalugu pissutsit qulaani taaneqartut pissutigalugit taxakortip qaqugukkut atornissaa pissusissamisoornersoq uanga nammineq naliliiffigisinaajuaannarsimavara. Pisortaq aatsaat apereqqaarlugu atuisarnissamik siornatigut peqquneqarsimanngisaannarpunga. Allaammi tamatuma paarlattuanik ataqatigiinneqarnerni taamaattuni isumasiorneqarajuttarsimavunga. – Ukiuni tamani imaattuaannarsimavoq sulisoqatigiikkuutaat namminneq aaqqissinnaanngisaminnik ajornartorsiuteqarunik uannut toqqaannartumik sianersinnaallutik nalunagu. Ajornartorsiut oqarasuaatikkut oqaloqatigiilluni aaqqinneqarsinnaanngippat tamatigoruinnanagajak taxarlunga Utoqqaat Illuannukartarpunga, tassaniittarlungalugu ajornartorsiutip aaqqinneqarnissaata tungaanut. Sanasut assigisaasalu suliffeqarfiutaasa assigiinngitsut uppernarsarsinnaassavaat tassaagajuttartunga pisariaqalerfiatigut sassartartoq, naak Utoqqaat Illuat ukiorpassuit kingullit ingerlaneranni pedeleqarsimagaluartoq. Suliassat atorfimma allaaserineqarnera tungavigalugu akisussaaffippiarisakka suliariartorniarlugit ukiorpassuarni “apereqqaartariaqartarsimanngikkaluarpunga”. Taamaaliorneq oqaatigilluaannarlugu aamma eqarpallaarsimassagaluarpoq.

Aamma oqaatigisariaqarunarpoq taxakortit eqqarsaatigalugit “kortit namminerisat” aamma “korti ataatsimoorussa” immikkoortisimagatsigit, kingullermillu tiggummiqartup eqqortumik atuineq nammineq akisussaaffigisarmagu. Nalunngilara korti taanna atussagaanni allamit akuersissummik piniaqqaartariaqarsimanngisaannartoq. “Korti ataatsimoorussa”-mik taaneqartartoq immikkoortortaqarfinni atorneqarfissaminiittarpoq, sulisunillu tamanit atorneqarsinnaalluni, tassanili erseqqissumik piunasaqaataavoq taxarnissap peqqusissutaasimanissaa imaluunniit taxartooqannginnerani immikkoortortaqarfiup pisortaata pisortalluunniit allap akuersereersimanissaa. Tassa tassani kortip atorneqannginnerani “aperisoqqaartariaqarpoq”.

Suliantoqquneqaratarsinnaaneq eqqarsaatigalugu taxakorti pillugu takisuuliungaatsiarninnut pissutaavoq tamatuma suliamut matumunnga annertuumik ataqarnera. Siusinnerusukkut tikkuakkattut kommunip allagaanit siullernit 24.-09.2014-imeersunit erserpoq [utoqqarnut tunngasuni taamani pisortaasoq] isumaqartoq immikkoortortaqarfinni peqqissaasut pedelilu kisimik suliantoqquneqaratarsinnaasutut pigaartuusartut, taakkulu kisimik namminerisamik kortimik atuisinnaatitaasut. Arlaleriarluini oqaatigineqareersutut Utoqqaat Illuanni ukiuni 29-ni suliffigisanni tamani tamatuma pissuseqataanik suliantoqquneqaratarsinnaasutut pigaartuusarsimavunga. Taamaattoq oqartoqarsinnaalluarpoq [utoq-

qarnut tunngasuni taamani pisortaasup] uanga suliartoqquneqaratarsinnaasutut pigaartuusarninnik paatsuinera akuerinnikkumanginneraluunniit suliap matuma kukkusumik aallaaveqalerneranut pissutaasoq.

[Utoqqarnut tunngasuni taamani pisortaasup] allakkani 10.10.2014-imi oqaatigisai pillugit tulluittuni oqaaseqaateqassaanga. Siusinnerusukkut allagaasimasunik uteqqiivallaartutut ikkuma ajuusaarutigeqqissavara.

- "Immikkoortortaqarfinit assigiinngitsunit taxartarsimanermut attuumassuteqarsinnaasunit uppernarsaatnik pissarsiniarsarisimagaluarpunga. Tak. ilanngussaq 1"

Oulaani oqaatigineqartutut ajornartorsiuteqalersillugu uannut toqqaannartumik sianernissamut tikilluaqqusaanertik immikkoortortaqarfiit tamarmik nalunngilaat. Pisut ilarpassuini pedelimut soorunalimi sianersinnaapput. – Aggeqqusineranut taakkununga uppernarsaasiineq eqqarsaatigalugu uanga erseqqissumik paasininnera unaavoq ajornartorsiut pileraangat aatsaat sianertoqarajuttartuq, tassalu imaappoq sianernernut allassimasunik "uppernarsaateqartuaannartanngitsoq". – Taamaattumik isumaqarpunga immikkoortortaqarfiit ullorsiutaasa assilineri mianersuuttariaqarluinnartut. Allattuisoqarsimannginnera ajornartorsiuteqannginnermut - taamalu aggeqqusisimannginnermut – uppernarsaataasinnaangilaq. Igaffik eqqarsaatigalugu oqaatigisariaqarpara ullorsiutit quppernerat [utoqqarnut tunngasuni taamani pisortaasup] assilisimasaa tassaanngimmat igaffiup nalinginnaasumik ullorsiutaa. Immikkoortortaqarfiit tamarmik Maylandip "Diplomatkalender"-ia ukiorpassuarni nalinginnaasumik ullorsiutitut atugarisimavaat.

Pingaarutilik suli tassaavoq sulisut uannut toqqaannartumik sianersinnaanermik sungiussisimanerat, - aammattaaq pingaarutilik tassaavoq [utoqqarnut tunngasuni taamani pisortaasup] periaatsimik taasuminnga allanngortitseqqullunga qinuiginnissimanngisaannarnera. – Aap, taxartarneq pillugu periaatsit immikkut oqaloqatigiissutigisimanngisaannarpavut.

- 01.06.2014-imi taxarsimanerit.

Taakku sulisut sulinerminnik nalunaarsuiffittut naqittagaannik taarsiinnermut attuumassuteqarput, [utoqqarnullu tunngasuni taamani pisortaasooq] isumaqarpoq tamanna pillugu siumut ilisimatinneqareersimasariaqaraluarluni. Tassani [utoq-

qarnut tunngasuni taamani pisortaaup] suliassama suliassallu [paaqqutarinnifimmi allami] allaffimmi fuldmægtigimi sularisartagaasa assigiingissutaannik ilisimasaqarunanginnera tunngaviusumik uterfigaarput. – Ukiut ingerlaneranni ataasinngorneq ulapaarfiussasoq erseqqikkaangat, pisortaq paaseqatigilluinnarlugu, nalunaaquttap akunneri arlallit sapaatit akunnerata naanerani suliffigisarpakka, Utoqqaat Illuanni ataasinngorneq sapinngisamik pitsaasumik akimmisaarfeqanngitsumillu ingerlasinnaaqullugu. Tassa imaappoq qaangiuttoorneq pitsaannerpaamik siunertaqarluni pisoq, massakulli pinerlunniarnertungajalli isigineqalersoq. – Pisumi tassani [utoqqarnut tunngasuni taamani pisortaaup] apereqqaarneqarnissaa aamma eqqaasimanngisaannarpara. Periaaseq allanngortinneqassasoq taassuma oqaatigineqartutut nalunaarutigisimanngisaannarpaa. – [utoqqarnut tunngasuni taamani pisortaaup] oqarpoq qaammatip siuliani taamatut sulisoqarsimanera takusinnaanngikkini, taamatulli sulineq qaammatip naanerani (sulisut sulinerminnik nalunaarsuiffittut naqittagaasa) sapaatit akunnerata naanerani allanngortinneqartussaanerannut soorunalimi ataneqarpoq.

[Utoqqarnut tunngasuni taamani pisortaaup] aamma oqarpoq [...-nik] sulisoqarnissaq aalajangersagaasoq. Kisitsisip eqqortup [...-nera] eqqaassanngikkaanni tamanna ajunngilaq. – Kisianni naqittakkat [...-t] eqqunngitsuunerat [utoqqarnut tunngasuni taamani pisortaaup] oqaatiginiarsarippagu nalinginnaasumik kisitsinerup takutissavaa allaat naliliinikinaarsimasinnaasunga, oqaatigineqareersutummi taartaasartorpassuit pineqartunut aamma ilaammata.

- 30.06.2014-imi taxarsimaneq

Taxarsimaneq taanna eqqarsaatigalugu taxakortip tassani ilumut pissutissaqartumik atorneqarsimanerata assortuussutaasinnaanera paasisinnaavara. – Pisumi tassani malittarisassanik erseqqissaaneq – tassalu aamma naveersineq – kukkusutut isiginavianngilara. Tamannali siusinnerusukkut eqqarsaatiginngiinnarsimavara. – Taamaattorli taxarsimanerup sulinermut ilumut attuumassuteqarnera aalajangiusimaniarpara.

[Utoqqarnut tunngasuni taamani pisortaaup] oqarpoq ullormi tassani kingusisukkut ataatsimiinnerit pillugit imaqarniliortoqarsimaneranut uppersaatinik nassaarsinnaanani. Tamanna ilumuusaaq, uangalu nammineq aamma isumaqarneruvunga kingusinnaarneq sanasunik/sulisartunik sulisoqarneranik niueqatigisartakkalluunniit takkunneranik pissuteqarsimassasoq. Tassalu pisunik immik-

koortorta qarfiup ullorsiutaani nalunaarsorneqarsimanaviannngitsunik, immikkoortorta qarfiimmi toqqaannartumik attorneqarsimanngimmata.

- 21.07.2014-imi taxarsimaneq

Taxarsimaneq taanna pillugu nutaanerusunik ilassutissaqangaanngilanga, taassuma kommunip allagaani oqaatigineqartutut "utimut taxarnej"-runnginnera eqqaassanngikkaanni. – Pineqartoq tassaagunavippoq tuavoriarama angallassinermik suliassaq sapinngisamik pilertornerpaamik akimmisaannginnerpaamillu naammassipallakkumallugu kortimik namminerisannik atuisimamera. – [Utoqqarnut tunngasuni taamani pisortaasup] aamma nalunavianngilaa angallassinert tamarmik biilertup allattuiffiani allattorneqartannngitsut, - taamatuttaarlu nalunaviarnagu angallassinernik suliassaqartarmat piffissani Utoqqaat Illuata biiliisa suliassanik allanik isumaginninnerisa nalaani.

- 26.07.2014-imi taxarsimanerit

[Utoqqarnut tunngasuni taamani pisortaasup] taxarsimanerit taakku pillugit oqaaseqaataasa uanga atorfimma suliassanik sunik imaqarneranik tunngaviusumik paasinnissimannginneq suli ataasiarluni takutippaat.

Uanga pedelip feriarnerata nalaani taassuma suliassaanut akisussaaffimmik ingerlaannartumik tiguisarnera ukiorpassuarni tamani Utoqqaat Illuanni pedeleqarnermi pissusissamisoorluinnartuusimavoq. Tamatumunnga atatillugu aamma eqqaamaneqartariaqarpoq uanga Utoqqaat Illuat pedelimik atorfinitsitsinngikkallarmalli Utoqqaat Illuanni iluarsaassassanut aserfallatsaalisassanullu akisussaaffimmik tigumminnituusimamera, - akisussaaffimmik atorfimma allaasserineqarnerani suli ilaasumik. – Taamaattumik pedelip feriarnerani taassuma suliassaanik uanga tiguisarnissara isumaqatigiissutigineqarsimanngitsoq [utoqqarnut tunngasuni taamani pisortaasip] oqarnera uannut isumaqanngilluinnarlunilu eqqumiitsorujussuuvog. Pissutsit sulinermi pisussaaffiup iluaneereersut pillugit immikkut ittumik isumaqatigiissuteqarnissaq pisariaqartuusussaannngitsoq isumaqarpunga. – Akisussaaffik taaneqartoq tiguisannngitsuugukku tamanna uanga pisussaaffinnik sumiginnaanertut nammineq isigisimassagaluarpara, tamannalu ilungersunartorujussuusussaavog.

Periaatsit arlallit ukiorpassuarni atuuttuusimasut tunngaviusumik taamatut allanngortinniarsarigaanni suliarni illua'tungiusutut susassaqtut allannguutit pillugit paasissutissanik pisariaqartunik naammattunillu ilisimatinneqarnissaat soorunalimi pisariaqartuuvoq, - minnerunngitsumillu suliassat allaaserineqarneri pisutsinut nutaanut naleqqussarlugit. – Uanga erseqqissumik paasinninnera unaa-voq taamatut pisoqarsimanngisaannartoq.

- 14.08.2014-imi taxarsimanerit

[Utoqqarnut tunngasuni taamani pisortaasup] pissutsit eqqumiitsut arlallit saqqummiussimanngitsuuppagit siusinnerusukkut nassuiaatiga sukumiisuusooq isumaqassagaluarpunga.

[Utoqqarnut tunngasuni taamani pisortaasup] immikkoortortaqaqarfimmi peqqissaasunik uanga taxakortinnik atuissimanngitsunik oqaloqateqarsimalluni oqarnera eqqumeeqaaq. Soorunalimi taamaaliorsimanaviangillat, uangami kortera allanut tunniussimanngisaannarakku. – [utoqqarnut tunngasuni taamani pisortaasup] oqaasii tullit paatsuunganalaarput, oqaatsitigulli "paatsooqatigiinnernik" tassunga pisuutitsiniutigiumanngilluinnakkannik pissuteqarsinnaallutik.

Allarluinnarli uanga paasinninnera malillugu suliarnut attuumassuteqanngitsoq [utoqqarnut tunngasuni taamani pisortaasup] saqqummiuppa. [Utoqqarnut tunngasuni taamani pisortaasooq] oqarpoq 5. augustimi stressertera pissutigalugu immikkoortortaqaqarfimmi peqqissaasumit [...mit] angerlartinneqarsimasunga. Ullua eqqortuusinnaagunarpooq, aamma ilumoorpoq taamani sorpassuit nalorni-naqisumik stressernartumillu piffissami sivisunerusumi ingerlasimammata.

Nassuiaatissarli eqqortoq imaappooq:

Augustimi (5. augustiulluarsinnaavoq) ataatsimiinnermi immikkoortortaqaqarfimmi peqqissaasup [...-p] peqataaffigisaani taamani sulisut pisortaannit [...mit] napparsimallunga sulinngiffeqarnissannik akuerineqarpunga, stressertermut takusutissat pissutigalugit. Isumaqatigiissummili tassani nakorsat peqqissaanermilluunniit suliartut allat – taamalu immikkut nakorsaasersuineq – eqqaaneqarsimanngillat. Taamaattumik tamatumunnga atatillugu nakorsiarnermut nakorsaatinillu aallernermit taxakortimik atuisimaneragaanera eqqoriaanerinnaavoq, isumaqarpungalu tamanna suliarni matumani atorneqarsinnaanngitsoq.

Isumaqarpunga taxarsimanerit kingulliit pillugit siusinnerusukkut allakkani oqaaseqaatigineqartut saniatigut oqaaseqaateqaqqinnissara pisariaqanngitsoq.

Kommunip allagaani 10.10.2014-imeersuni naggasiutitut oqaaseqaatini allaffimmi nalunaarsuiffittut allattaavik inunnut namminerisaminnik taxakorteqartunut naatsorsuussaasoq eqqaaneqarpoq.

Akuersissutitut taaneqartut Utoqqaat Illuanni pisortaqatigiinnit immikkoortortaqarfinniluunniit peqqissaasunit pissarsiarneqartussat sulii aammattaaq eqqartorneqarput. Taaneqartoq kingulleq assigiinngitsorpasuarunik imaqarpoq, immikkoortortaqarfinnilu peqqissaasut eqqarsaatigalugit taakku ataqatigiinneqarnermi tassani ataani atsiortoq eqqarsaatigalugu pingaarnerusutigut pisinnaatitaalersi-manerangooq oqaatigineqartut nutaajulluinnarpoq. – Taamatutaaq siusinnerusukkut oqaatigineqartut uanga paasinninnera unaavoq suleqatigiikkuutaat akornanni allanngortiterinissamik kissaateqarneq ajortortaqanngitsoq, - kingu-moortumilli atuutilersumik soorunalimi taamaaliortoqarsinnaanani, - illua'tunge-risallu susassaqtut ilisimateqqaarneqartariaqarlutik.

Naggasiutaasumik oqaaseqaatini aamma oqaatigineqarpoq "taxartarsimanerit piffissami kingullermi malunnartumik amerleriarsimasut ...".

Tamanna piumasaannaliornerulluinnarpoq (utoqatserpunga taama oqarama).

Illu ataatsimut isigalugu taxarsimanernut akiligassiissutit imaapput:

Juni kr. 4.562

Juli kr. 1.683

August 3.942

Ataanilu atsiortumut:

Juni kr. 245

Juli kr. 198

August kr. 279

Illup piffissami kingullermi namminerisaminik biileqarsimannginnera ilanngukaanni oqaatigineqartut kukkusumik takutitsisuupput. – Kisitsisitigut naatsor-

sueqqissaarnermit isigalugu aamma isumaqarpunga atuineq allannguuteqartoq oqalussagaanni piffissaq sivisunerusoq nalunaarsuinermit atorneqartariaqartoq.

Ombudsmandip allagaanut 12.11.2014-imeersunut [K Kommunip] akis-sutaa 09.03.2015-imeersoq pillugu naggataatigut imaattunik oqaase-qaateqassaanga:

Kommunip allagaani aallaqqaasiutitut oqaatigineqarpoq "taxakortimik atornerluisoqarneranik ilimatsaassineq" pineqanngitsoq, pineqartorli tassaasoq "taxakortimik atornerluineq uppenarsaasersugaasoq". Taxaatileqatigiiffiup akiligassiissutai uppenarsaatitut innersuussutigineqarput.

Tamanna pillugu oqaatigineqaannassaaq ilumut taxartoqarsimanersoq qularutissaanngitsoq, - taxarsimanerilli inatsisinik unioqqutitsisuunersut unioqqutitsuunnginnersulluunniit isumaqatigiinngissutigineqartorujussuuvoq.

Immikkoortumi 24.9.2014, *nal. 9:50*-imi oqaatigineqarpoq pisortaq [...] suliani missingiussilluni nalileereersimasoq oqarsimasorlu [A-p] soraarsinneqarnissaa kissaatigigini. Ilanngussaq 4 [utoqqarnut tunngasuni taamani pisortaaup] sulusoqarnermi inatsisilerituumut [...]mut] apeqquteqaataa tamatumunnga peqatigitillugu innersuussutigineqarpoq.

Apeqquteqaammi tassani ilaatigut allassimavoq "Takusinnaavara [A] qaammatini kingullerni pingasuni qaammatit tamaasa ulluni sisamani-tallimani angerlamut taxartarsimasoq".

Naatsorsuitsiaraanni takuneqarsinnaavoq qulaani taaneqartut eqqorpata piffisami pineqartumi angerlamut 12-15-eriarluni taxatorqarsimassasoq. Taxarsimanerit tamarmiusut aqqanilliummata pisariaqanngitsumik ingasattajaartoqalereerpoq. Tamatumunnga peqatigitillugu erseqqippoq taxarsimanernit aqqaniliusunit tallimani akii pissutigalugit Utoqqaat Illuannit [angerlamut] taxarnerusimavianiingitsut. – Taxarsimanerit inatsisinik unioqqutitsisuunersut unioqqutitsisuunnginnersulluunniit oqallinneq puigorluinnaraanni kisitsisit taaneqartut manna kisiat takutippaat, tassalu ilanngussami 4-mi 100 procentit 150 procentillu akornanni ingasattajaartoqartoq. – Isumaqarpunga tamanna suliami taama ilungersunartigisumi pitsaanngilluinnartuusoq. Aamma isumaqarpunga taamatut ingasattajaarneq suliap ingerlanerani taama siusitsigisukkut pinera pitsaanngitsorsu-

jussuusoq, taamaattumillu suliap aallaqqaataanilli equngasumik ingerlanneqarneranut pissutaaqataanngitsoorsinnaanani.

Immikkoortumi 24.9.2014 nal. 10:04-mi atorfimma taxarnissamik annertuneru-sutigut pisariaqartitsiviunnginnera oqaluttuariniarlugu oqaaserpaalussuit ator-neqarsimapput. Tamanna taxarsimanerit ataasiakkaat pillugit oqaaseqaatit matu-mani uteqqissanngisakka tunngavigalugit naliliivigineqartariaqarpoq. - Aamma takuneqarsinnaavoq suliartoqquneqaratarsinnaasutut pigaartuusarnera suli pi-moorukkuminaatsinneqartoq, tamannali pillugu oqaaseqaateqaqqinnissaq aam-ma pisariaqarsorinanngilaq. Aammattaaq oqaatigineqarpoq qasugaangama a-ngerlamut taxartarlunga oqarsimasunga. Tamanna ingasaassineruvoq pissusiviu-sunik tunngaveqanngitsoq. Oqaatsikka eqqaamaqqissaanngikkaluarlugit [utoq-qarnut tunngasuni taamani pisortaasumut] oqarsimassaanga sivisuumik ataatsi-meereerluni qasunarsinnaasoq, taakkulu piffissaq suliffiusoq qaangerlugu inger-lasimagaangata ilaanneeriarlunga angerlamut taxartartunga. – Tamatumali nali-nginnaasumik oqaasertaliussani taaneqartuni tamatigut periaasinngortinneqarne-ra eqqortuunngivippoq. – Aammattaaq tikkuarumavara taamatut taxartarnerup assortuussutaasinnaanera naveersinermullu pissutaasinnaanera siusinnerusukkut allaaserisanni oqaatigisimagiga.

24.9.2014 pillugu immikkoortumi tassani ilanngussami 5-imi [utoqqarnut tun-ngasuni taamani pisortaasup] sulisoqarnermut immikkoortortaqaarfimmut alla-gaanut allanut tunngasoq innersuussutigineqarpoq. "Taxakortimik atornerluineq" qulequtaraa.

Allakkat taakku oqaaseqaatinik akuerisinnaanngilluinnakkannik suliallu aallaq-qaataaniilli sangutinneqarneranut pissutaaqataasimasutut takorloorsinnaasannik imaqarpoq.

Allakkat imarisaasa ilarpassui pillugit oqaaseqaateqareerpunga, taamaattumillu nutaartaannai pillugit oqaaseqaateqassaanga. – Allakkat qiteqqunnerisa mis-saanni [utoqqarnut tunngasuni taamani pisortaasoq] allappoq: "Akivaanga kommuni manna malittarisassanit allaasunik malittarisassaqaqarunartoq!" – Taa-matut oqarsimanngisaannarlunga eqqaamavara, taamatullumi oqarsimagalua-ruma kukkusimassagaluarpunga, tassami kialuunniit nalungaviannngimmagu kommunip taxartarneq pillugu pingarnerusutigut malittarisassai kommunimi tamarmi soorunalimi atuuttussaasut.

[Utoqqarnut tunngasuni taamani pisortaasoq] nangilluni allappoq: "Aamma [A] oqarpoq immaqa sulisut allat taxakortini atortaraat!" – Tamanna toqqaannartumik salluneruvoq. Taamatut oqarsimanngisaannarpunga, ajornarluinnartussaalunilu, tassami taxakortima piginera tamaat allanut tunniussimanngisaannarakku. Kisianni oqarpunga, soorlu tamanna siusinnerusukkut allaaserisanni takuneqarsinnaasoq, pisuni nukinginnartuni/ulapiffiusuni ataasiakkaani namminerisamik kortera najugaqartut taxartinnerannut atortarsimagiga. Pisuni taamaattuni korti taxartartumut uanga nammineerlunga tunniukkiartortarpara.

Ilanngussaq 4 aamma 5 eqqaaneqartut suliap ingerlanerani siusinnerusukkut takusimanngilakka, taamaattumillu isumarpunga imarisaasa uanga paasinninnera malillugu paatsuinerusutut/eqqunngitsutut malugeqqunissaat pingaartuusoq.

Kommunip allagaani 09.03.2015-imeersuni immikkoortup kingulliup siuliani ilaatigut oqaatigineqarpoq [A] sulinermut atatillugu aamma sulinerup avataatigut nammineq taxartarnerup assigiinngissutaannik immikkoortitsisinnaassasoq kommunip erseqqissumik naatsorsuutigisimagaa. – Tassunga atatillugu sulisoqarnermut immikkoortortaqarfimmut siusinnerusukkut allakkani oqaatigisakka uteqqillugit oqaatigerusuppakka, tassalu piffissami suliami pineqartumi Grønlandsbankimi uanga nammineq kontonni atuneq pillugu naqitanngortitami takuneqarsinnaasutut 19-eriarlunga taxarsimasunga, kr. 1.401,00-nik naleqartunik. Tamanna uppernarsaatitut atorneqarsinnaanngitsoq nalunngikaluarlugu takutsisinnaalluarpoq namminerisamik suliffimmullu atasumik taxartarnermik immikkoortitsinnaalluartunga.

Naggasiutitut isumaqarpunga [utoqqarnut tunngasuni taamani pisortaa-sup] allagai 31.10.-2014-imeersut "Pineqartoq: Sianertarnitit unittariaqarput" eqqaasitsissutigineqartariaqartut.

Inatsisartut Ombudsmandiannut allakkanni 02.11.2014-imeersuni oqaatigisattut allakkat qulaani taaneqartut imarisaat tupigusuutigisorujussuuakka/ernummatigisorujussuuakka.

Suliaq matoorniarsarigunaraluarlugu toqqaannartumik salluliorneq suli tupassimassutigisorujussuua, - [utoqqarnullu tunngasuni taamani pisortaa-sup] sulisunik allakkani taaneqartunik oqarasuaatikku malersuisimanerarlunga pasilliutai

kusanaatsorujussuartut isigaakka. – Inummik ataatsimut oqarasuaatikkut oqaloqatiginneq ataaseq malersuinerlut isigineqarsinnaagunangilaq.

Isumaqarpunga [utoqqarnut tunngasuni taamani pisortaasup] allagai 31.10.-2014-imeersut suliarlu tamarmi oqaaseqaatinik ataqqinassutsimik innarliisunik akueriuminaatseqisannik imalerujussuusut.

Tassani aamma ilaavoq tarnikkut nanertuutit uannut namminerlut ilaqtannullu ukiup affanngulersumi tutsinneqartartut. Suleqatigisimasaniq minnerunngitsumillu Utoqqaat Illuani najugaqartunik ukiut ingerlanerini qanimut ilisarisisamasaniq maqaasisaqarneq malunnarsimaqalunilu annernarsimavoq.

Kiisalu peersitsineq aningaasaqarnikkut ilungersunartorujussuarnik malunnaqisunillu kinguneqarsimavoq, tassami akissarsiakka naluneqanngitsutut 10.10.-2014-imi ingerlaannartumik atuutilersumik unitsinneqarmata.

Naggasiutitut suliffiup nuannareqisap piffissami sulisinnaaffiup ilarujussuani tunniusimaffigisimasap qimattariaqalernerata annernarnera aamma oqaatiginngitsuussanngilara." (Atorfeqarfimmi nutsigaavoq)

Taamani illoqarfimmi B-mi Utoqqaat Illuanni isumaginninnermut immikkoortortaqarfimmi atorfiup suussusianik suliaasaanillu allaaserinninneq ulluleneqarsimanngitsoq A-p akissutaanut ilanngullugu nassiunneqarpoq.

K Kommuni suliaq pillugu ilassutaasumik oqaaseqaateqaqqullugu allakkatigut 6. oktober 2015-imeersutigut qinnuigaara. K Kommunimut ilaatigut imatut allappunga:

"1. [...]

Kommunip oqaaseqaataa, assilinera ilanngullugu nassiussara, pillugu [A-p] oqaaseqaataa 25. marts 2015-imi tiguakka.

2. [K Kommunip] oqaaseqaataa 9. marts 2015-imeersoq matumunnga peqatigitillugu uterfigaara, kommunilu qinnuigalugu kommunip imminik peersitsinissaata tungaanut Utoqqaat Illuanni pisinnaatitaanernik suliamut sunniuteqartunik allan-

ngortiterisoqarsimaneranik [A-p] nassuiaataa ilassutaasumik oqaaseqaammini isummerfigeqqullugu.

[A-p] nassuiaatitut ilaatigut oqaatigaa pisortaqatigiit ilaattut siusinnerusukkut i-sigineqarsimalluni, taxakortilu atussaguniuk qaninnerpaamik pisortarisaminit akuereqqulluni qinnutigisariaqartarsimanagu.

[A-p] nassuiaatitut aammattaaq oqaatigaa pedelip suliassai taassuma feriarnerani aalajangersimasumik periaatsitut isumagisarsimagini.

Kommuni qinnuigaara suliassaqarfimmi tassani periaatsimik allannguisoqarsimappat tamanna qanga pisimansoq kiisalu taamatut allannguiq [A-mut] qanga qanorlu iliorluni paasissutissiissutigineqarsimansoq ilassutaasumik oqaaseqaammini itisileqqullugu.

3. [K Kommuni] aammattaaq qinnuigaara Utoqqaat Illuata nalunaarsuiffimmik taxarnerit tamarmik nalunaarsorneqarfissaannik peqannginneranik [A-p] nassuiaataa isummerfigeqqullugu.

4. Kiisalu [K Kommuni] qinnuigaara [A-p] 23. september 2014-imi oqaloqatigineqarnissaanut kommunip aggeqqusissutaata ataatsimiinnerlu pillugu imaqarniliap assilineri uannut nassiateqqullugit."

K Kommunimut allakkakka 6. oktober 2015-imeersut pillugit A-p oqaaseqaatai allakkatigut 15. november 2015-imeersutigit tiguakka. Allakkanit taakkunannga makku erseput:

"Ombudsmandip "[K Kommunip] [A-mik] peersitsinera" pillugu [K Kommunimut] allagai 6. oktober 2015-imeersut ([...-mik] normoqartut) pillugit oqaaseqaatit:

Tunngaviusumik isumaqarpunga kommunip pasilliutai pillugu isumaga Ombudsmandimut siusinnerusukkut allagarisarsimasanni erseqqissumik oqaatigereeriga. Ombudsmandip kommunimut allagai kingullit pillugit arlalinnik oqaaseqaateqarumalerninnut pissutaavoq Ombudsmandimut attaveqatiginninnerup tamangajammi allakkatigut ingerlasimamera, tamannalu nalornilersitsivoq tunuliaqutaasut pillugit paasissutissat pisariaqartut ilumut pisariaqarneratut erseqqitsigisumik saqqummersimansut.

Immikkoortoq 2 pillugu.

Utoqqaat Illuanni pisinnaatitaanernik allanngortiterineq.

Siusinnerusukkut oqaatigisimasattut taamana erseqqissikannersimavoq allanngortiterinerup ingerlanerata ilaani pineqartoq tassaasoq suliassat siusinnerusukkut "allaffimmiissimasut" immikkoortorta qarfinni peqqissaasunit siunissami isumagineqalissasut. Tamanna qanorpiaq ingerlassanersoq, suliassat sorpiaat allanngortiterinermi ilanngunneqassanersut – taamani suli erseqqissumik oqaatigineqarsimangilaq – pingaartumillu ataani atsiortumut. Nalunngilara [utoqqarnut tunngasuni taamani pisortaasup] immikkoortorta qarfinni peqqissaasut kisiisa – allanngortiterinerup sumerpiaq ima qarnera pillugu - ataatsimeeqatigisarsimagai.

Taamaattumik peersitsinerup tungaanut sulininni tunngavigisara soorunalimi tassaasimavoq atorfik pillugu allaaserisaq piousoq, taannalu Ombudsmandimut siusinnerusukkut nassiutereerpara.

Atorfik pillugu allaaserisaq illumik ukiorpassuarni sukumiisumik ilisimasaqarninik ila qarluni pissusissamisoorluinnartumik tassaasimavoq pedelip feriarnerata nalaani illumi iluarsaassassanut aserfallatsaalisassanullu akisussaaffimmik tamakkiisumik tiguisarninnut tunngaviusoq. Tassa biilertartorput ulluinnarni suliassanik nalinginnaasunik tiguisartoq suleqatigalugu. Siusinnerusukkut allakkani oqaatigineqartutut aallaqqaataaniilli –tassalu pedelitut atorfik pilersinneqanngikkallarmalli – akisussaaffeqarfiup taassuma isumaginera sungiusimasimavara.

"Pisortaqatigiit ilaattut" isigineqarneq eqqarsaatigalugu tamanna akisussaaffeqarfinnut atorfirmik allaaserinninnermi oqaatigineqartunut aamma ataneqarpoq. Utoqqaat Illuanni ukiorpassuarni assigiinngitsorpassuarnik suliaqartarsimanera pissusissamisoortumik aamma ilaavoq. Suliap taassuma illumini ingerlataq tamani annertuumik misilittagaqarlersillungalu ilisimasaqalersissimavaanga.

Oqaluttuassartap ilamininngua naatsuaqqamik eqqaalarlara.

[...]

Ukiuni taakkunani suliassanik agguataarineq erseqqissuusimavoq, tassalu [...-p (siusinnerusukkut pisortaasimasup)] suliassat peqqissutsimut peqqissaanermullu

tunngasut kiisalu illumi tunngaviusumik isummertarnermut tunnganerusut aallutissagai, uangalu aningaasaqarneq (matumani [..., ... -llu] eqqarsaatigalugit), allarpassuillu maani eqqartussallugit pisariaqanngitsut aallutissagikka. – Tamakku eqqaavakka illumik soqutiginninnerma tamatigoortorujussuullunilu assigiinngitsorpassuarnik tamanik attuumassuteqarfiginninnera erseqqisarniaannarlugu.

“Utoqqaat Illuannit qangatuumiit” “paaqqutarinniffimmut nutaaliaasumut” ikaarsaariarnerup ilaani pisortatut atorfik kommunip marloqiusatut avissimavaa, tassa peqqissutsimut paaqqutarinninnermullu tunngasumut aamma aqutsinermut tunngasumut – taamani “Forstander A”-mik aamma “Forstander B”-mik taaneqartunik (pappiarat assilineri sulii pigaakka). Ilusiliinerli taanna Pisortat Isumaqaatigiinniartartoqatigiivinit pisortatigoortumik akuerineqanngilaq, periaaserli taanna taamanimiilli (1987-imit) peersinneqarnerma tungaanut atorineqarsimavoq, tassalu pisortaq tassaalluni peqqissutsimut paaqqutarinninnermullu tunngasunik ilinniagalik pingaarnertut akisussaaffimmik soorunalimi tigummisaqartoq.

[... (siusinnerusukkut pisortaasimasooq)] pisortatut ukiut qulit sinnerlugit sulereerluni atorfimminit tunuarmat tamanna uanga ulluinnarni suliaassannut malunaatilimmik sunniuteqanngilaq, tassami suliaassanik agguataarineq qulaani taaneqartoq ajunngilluinnartumik ingerlasimasooq pisortap nutaap akuersaarluinnarmagu.

Taamaalilluni ulluinnarni suliaassanik akisussaaffimmillu agguataarineq taanna apeqquserneqanngilluinnarluni ukiuni 15-ingajanni ingerlasimavoq - taamalu pisortap illumi ulluinnarni pisortaanera soorunalimi aamma apeqquserneqarani.

Siusinnerusukkut aamma oqaatigineqartutut pisortap uangalu ataatsikkut feriantanginnissarput pisortap pingaartillugu isiginiartuaannarsimavaa.

Pisortalli peqannginnerani immikkoortortaqaqfimmi peqqissaasooq pisortaagallartutut inissisimajuaannarsimavoq, tamannalu peqqissutsimut peqqissaanermullu tunngasunik ilinniagaqarsimasup illumi qullerpaatut tamatigut akisussaasuunisaanik tunngaviup toqqarneqarsimaneranik pissuteqarpoq.

Immikkoortortaqaqfinnili peqqissaasut suliaassanut ataatigut atsiortumit isumagi-neqartunut siusinnerusukkut toqqaannartumik akuliutinngisaannarsimapput.

Ukiut 29-t ingerlaneranni illup aningaasaqarnera kisermaatiusarlugu (soorunalimi pisortamut akisussaaffeqarluni) ingerlassimagaanni sulisoqatigiikkuutaanullu tamanut apeqqutini assigiinngitsuni ilitsersuisuusimallunilu siunnersuisuusimagaanni pisortaqtigiit ilaattut isigineqarsimaneq soorunalimi tupigusuutissaanngilaq.

Pissutsit qulaani taaneqartut utoqqaat pisortaata [utoqqarnut tunngasuni taamani pisortaasup] sianiginngitsuusaarusuinnarsimagunarpai, siunissamillu nammineq (kommunillu?) takorluukkani kisiisa pisimasunik naliliinerminut tunngaviutinniarunarlugit.

Immikkoortoq 3 pillugu.

Taxartarnernik tamanik nalunaarsuiffik

Illumoorpoq taxarnernut tamanut ataatsimut nalunaarsuiffimmik Utoqqaat Illuani peersinneqarnerma tungaanut atuuttoqarsimanngisaannaarmat.

Paatsuuisinnaanerit pinaveersaarniarlugit taamani biilernernik sutigut nalunaarsuisoqartarnersoq naatsumik oqaluttuarissavara (naak siusinnerusukkut paasisutissiissutigineqartunik ilaatigut uteqqiinerugaluartoq).

- *Biilertup nalunaarsuiffia* – Tassani biilernerit Utoqqaat Illuata innarluutilinnut bussiinik ingerlanneqartut kisimik pineqarput. Tassa taanna taxarnernut attuumassuteqanngilluinnarpoq.
- *Immikkoortorta qarfiit biilernernut nalunaarsuiffii* – Kortinut ataatsimoorusunik taaneqartunut immikkoortorta qarfinni ataasiakkaaniittunut immikkoortorta qarfimmilu akisussaasoq isumaqatigiissuteqarfigalugu ator neqarsinnaasunut tamanut nalunaarsuiffittut allattaaveqarpoq, immikkoortorta qarfiullu taxarneri tamarmik tassani allattorneqassallutik.

Taxakortit nammineq atugassatut taaneqartut pineqartillugit imaappoq taxarnerit tamarmik ileqquliussamik nalunaarsorneqartarnissaat piumasaqaataanngitsaq. Taxakortit nammineq atugassat taamaallaat inunnut suliartoqquneqaratarsinnaallutik pigaartuusartunut ([..., ..., ... aamma ...-mut]) tunniunneqarsimapput, kortimillu tunniussineq kortip siunertaminuinnaq – tassalu taxarnernut sulinermut attuumassuteqartunuinnaq - ator neqarnissaa illua'tungeriinnit tatigeqatigiisutigalugu pisimalluni. – Aaqqissuussineq taanna qasungavallaarnersoq massak-

kut pisimasut kingorna soorunalimi assortuussutigineqarsinnaavoq, pissutsilli taamaassimanerat allangortissinnaanagu.

Immikkoortorta qarfinni peqqissaasut eqqarsaatigalugit taakkua piffissap suliffiusup nalinginnaasup avataatigut taxanik atuinertik ataatsimut isigalugu aqulluarnarpaat, tamannali taxarnerit nalunaarsorneqartarnissaannik piumasaqaammut attuumassuteqarpallaanngilaq, taakkumi piffissap nalinginnaasumik suliffiusup avataatigut aggeqquneqarnerminnut isumaqatigiissutikkut (overenskomst) aningaasanik assigiinngitsunut ajunngitsorsiassaqaalersimmata, taamaattumillu aggeqqusinerit taamaattut akissarsiaqartitsinermut oqartussaasunut uppernarsarsinnaasussaallugit.

Immikkoortoq 4 pillugu.

Ataatsimiinnissamut 23. september 2014-imi aggeqquneqarneq.

Kommuni 23. septemberimi ataatsimiinnissamut allakkatigut sumillunnit aggeqqusinnngilaq. Ataatsimiinneq ullaap tungaani pivoq, aggeqqusinerlu ulloq taanna oqaasiinnartigut pilluni.

Taamaalilluni ataatsimiinneq taanna pakasaasorujussuuvoq, susoqarnissaalu nalulluinnarsimavara. – Matuersaatit ataatsimiinnerup naanerani tunniuttariaqarpakka. Atisakkalu ateriarlugit illu qimattariaqarlugu, paasissutissat ukiut 30-ngajaat ingerlaneranni katersorsimasama misissornissaannut sunnguamilluunniit periarfissaqarnanga. Uanga isumaqarpunga paasissutissat taakku paasissutissarpassuarnik iluatinnartunik imaqtartut, paasissutissallu taakku massakkut tammarluinnarsimagunarpur.

Ataatsimiinnerup imaqarnillorneqarnera eqqarsaatigalugu kommuni ilumut imaqarnilliorsimansoq soorunalimi naluara, qanorluunniilli oqartoqaraluarpat imaqarniliamik taamaattumik takutinneqarsimanngissaannarpunga.” (Atorfeqarfimmi nutsigaavoq)

Ilassutaasumik oqaaseqaateqaqqusissutigaa 6. oktober 2015-imeersoq K Kommunip allakkatigut 30. november 2015-imeersutigut ilanngussartalitsigut akivaa. Akissummit tassannga ilaatigut makku erserput:

“[...]”

Imm. 2 pillugu: **Ombudsmandip kissaatigaa kommunip peersitsinerup tungaanut Utoqqaat Illuanni pisinnaatitaanernik suliamut sunniuteqartunik allanngortiterisimanera pillugu [A-p] nassuiaata [K Kommunip] i-sommerfigissagaa.**

[K Kommunip] utoqqarnut tunngasuni aqqissuussinermik 1. maj 2014 aallarnerfigalugu atuutilersumik allanngortitsimanera ilumoorpoq.

Allannguinnikkut tassuuna illoqarfimmi B Utoqqaat Illuanni (UI-mi) kiisalu [paaqqutarinniffimmi allami] pisortatut atorfiit atorunnaarsinneqarput, utoqqarnullu tunngasut ilusilerneqarlutik sulianut tunngasunut pisortap ataani utoqqarnut pisortaliinikkut pisortallu tulliliinikkut kiisalu utoqqaat illuisa illuinnarni aqunneqarnerat immikkoortortaqarfinni peqqissaasunut inissinneqarluni.

Aqqissuussinikkut allannguut taanna kommunalbestyrelsimit akuerisaavoq, sulisunullu sulisut ataatsimiinneri aqqutigalugit ilisimatitsissutigineqarsimalluni. Aqqissuussinikkulli allannguut taanna suliamut pineqartumut sunniuteqanngilaq, tassami Utoqqaat Illuanni pisortaqatigiit sulinerat 1. maj 2014-ip tungaanut taamani pisortaasumi [...-miinnaq] inissisimasimammat.

[A] tatigisaalluni sulisuusimavoq, pisortaqatigiinnulli ilaasimanani, aamma ulluinnarni aqutsinermi suliasat eqqarsaatigalugit, aningaasaqarnermulli tunngasut isumagisarissimallugit, UI-mi pisortaqatigiinnut, kingusinnerusukkullu utoqqarnut tunngasunut, toqqaannartumik akisussaaffeqarluni.

Taxakortimik atuineq eqqarsaatigalugu [K Kommunip] manna siusinnerusukkut innersuussutigisimavaa, tassalu taxakortimik atuineq pillugu UI-p nammineq illit-sersuusaa kommunillu sulisoqarneq pillugu quppersagaa tunngavigalugit atuineq pillugu malittarisassat erseqqissuusut. Taxakorti taamaallaat aggeqqusisoqarnerani naalakkiuteqarnikkulluunniit sulisitaanermi atorneqarsinnaavoq.

Sulisoqarneq pillugu quppersakkamit taamatuttaaq erserpoq pisortarisaq qaninnerpaaq akuersiteqqaarneqartassasoq.

[K Kommunip] paasinninnera suli unaavoq taxartarsimanerit pineqartut aggeq-quneqarsimanermut naalakkiuteqarnikkulluunniit sulisitaanermut attuumassuteqanngitsut.

Immikkoortoq 3 pillugu: **Ombudsmandip [K Kommuni] qinnuigaa Utoqqaat Illuata nalunaarsuiffimmik taxarnerit tamarmik nalunaarsorneqarfissaannik peqannginneranik [A-p] nassuiaataa isummerfigeqqullugu.**

Nalunaarsuiffimmik taxarnernik tamanik nalunaarsuiffiusussamik peqannginneranik [A-p] oqaatigisaa [K Kommunip] misissorpaa. Taamani UI-mi nalunaarsuiffimmik peqarsimanersaq peqarsimannginnorsorluunniit [K Kommunip] pisortaqatigiit iluanni sulisut katitigaanerannik allangortitsisimaneq pissutigalugu uppernarsarsinnaanngilaa. Immikkoortorta qarfirmili peqqissaasup [...-p] oqaatigaa UI [K Kommunimi] suliffeqarfittut allatulli pisussaaffeqartoq taxarsimanerit allagartaat tamaasa misissussallugit, taxakorti peqqussut sulisoqarnerlu pillugu qupper-sagaq tunngavigalugit eqqortumik ator neqarsimanersaq paasiniarlugu. Suliassap taassuma qulakkeerneqarnissaa aningaasaqarnermik isumagisaqartup suliassarpiaraa, tak. pineqartup atorfiata suliaasalu allaaserineqarnerat.

Immikkoortoq 4 pillugu: **Ombudsmandip [K Kommuni] qinnuigaa [A-p] 23. september 2014-imi oqaloqatigineqarnissaanut kommunip aggeqqusisutaata ataatsimiinnerlu pillugu imaqarniliap assilineri nassiateqqullugit.**

Immikkoortorta qarfirmi peqqissaasooq [...] utaqqimaarsimavarput, taannami apeqqummik taassuminnga akiseqataasinnaagunarmat – taannalu Danmarkimiippoq, sap. akuunnerannilu 47-mi utertussaalluni, tassa ilassutaasumik oqaaseqaat allallugu 4.11-2015-imi aallartinnitta nalaani. Taanna oqarpoq mappi suli-ami allagaatinik [A-mut] tunngasunik imalik UI-p toqqorsiviani nassaarisinnaanngikkini, tak. **ilanngussaq 1**, e-maili 30.11.2015-imi nal. 13:27-mi nassiunneqarsimasooq. Taamaattumik **ilanngussaq 2** innersuussutigaa, tassanimi utoq-qarnut tunngasuni taamani pisortasooq [...] nassuiaalluni oqarmat ataatsimeeqatigisimagini. **Ilanngussami 2-mi** e-mailimi 24.9.2015-imi nal. 9.50-imi nassiu- neqartumi aamma allassimavoq 23.9.2014-imi ataatsimeeqateqarsimasooq. Taamaalilluta suliaq [A-mut] tunngasooq pillugu ilanngussat 2-p 3-llu saniatigut allanik uppernarsaatissaqanngilagut.

[K Kommuni] suliami tassani amerlanerusunik uppernarsaatissaqanngilaq, tassami [utoqqarnut tunngasuni taamani pisortaasoq maanngaanniit aallarsimammat, suliatigullu siusinnerusukkut pisortarisaa [...] aamma aallarsimalluni. Suliami matumani tamanna tunngavigalugu allanik ilassutissaqanngilagut, taamaallilutalu suliamut ilanngussavut tassunga naallugit." (Atorfeqarfimmi nutsigaa-voq)

Ilanngussat 1-imut 3-mut K Kommunip akissutaanut ilanngullugit nassiuneqarput. Ilanngussami 1-imi ilaapput mappip sulisumut A-mut tunngasup amigaataanera pillugu e-mailikkut 27. november 2015-imi aamma 30. november 2015-imi allagaasimasut. Ilanngussami 2-mi ilaavoq utoqqarnut tunngasuni pisortap sulisoqarnermut immikkoortortaqarfimmut e-mailia 24. september 2014-imeersoq, K Kommunip akissutaani 9. marts 2014-imeersumi ilanngussatut 4 ilannguneqartoq, qulaanilu issuarneqartoq.

Ilanngussaq 3 tassaavoq utoqqarnut tunngasuni pisortap sulisoqarnermut immikkoortortaqarfimmut e-mailikkut allaffigeqatiginninnerani allagaasoq 24. september 2014-imeersoq. E-mailikkut allaffigeqatiginninneq taanna tassaavoq utoqqarnut tunngasuni pisortap e-mailia ilanngussatut 2-tut ilanngunneqartoq tunngavigalugu allagaq. Tassannga ilaatigut erserpoq utoqqarnut tunngasuni pisortap misissuinermigut paasisimagaa A sulinermi immersugassamik akissarsialeriffimmut ukiorpassuannngortuni nassiussisarsimangitsoq. Utoqqarnut tunngasuni pisortap tamanna pillugu oqaatigaa sulinermi immersugassanik immersuisimanginnini A-p (23. september 2014-imi) oqaloqatigineqarnermini nassuerutigisimagaa, tamannamigooq qanganisarpaluppallaaqimmat.

Sulisoqarnermut immikkoortortaqarfik allaffigeqatigiinnermi utoqqarnut tunngasuni pisortamut allaqqippoq, aperalugulu suliami illua'tungiusup isumaanik tusarniaalluni allakkani Utoqqat Illuata kortip namminermt atugassanngortitap qanoq atorineqarnissaanik ilitsersuusaa pillugu immikkoortoq pillugu oqaaseqaatissaqarnermoq, imalu nangilluni:

“Angerlarsimallutik suliarloqquneqaratarsinnaallutillu pigaartuusut kisimik taxa-kortunik atuisinnaatitaapput, peqqissaasullu kisimik angerlarsimallutik UI-mi pigaartuusarput, aamma peqqissaasut pedelilu kisimik suliarloqquneqaratarsinnaallutik UI pigaartuusarput. Sulisoqatigiillu taakku kisimik aggeqquneqarsinnaapput, suliarloqqullugillu naalakkerneqarsinnaallutik. Illillu sulisoqatigiit taakku ilaginngilaatsit.” (Atorfeqarfimmi nutsigaavoq)

Utoqqarnut tunngasuni pisortap sulisoqarnermut immikkoortortaqaqarfik imatut akivaa:

“Taxakorti sulinermi atugassaavoq akileraarusigassaangitsoq, taamaallaat aggeqqunerqarnermi atorfeqarsinnaasoq.

[...] soq taxakorteqarnersoq naluara??” (Atorfeqarfimmi nutsigaavoq)

Sulisoqarnermut immikkoortortaqaqarfiup tamanna akillugu A-p atorfinitsineqarnerani allakkat innersuussutigai, oqaatigalugulu A suliarloqquneqaratarsinnaanermut tapeqartoq, taamalu pedeli peqqissaasullu assigalugit suliarloqquneqarsinnaasoq. Sulisoqarnermut immikkoortortaqaqarfiup tamatuma kingornatigut malugeqqullugu oqaatigaa oqaasertalersuineq tamanna tunngavigalugu allannguuteqartinneqalaarsimasoq.

K Kommunip allagai 30. november 2015-imeersut ilanngussartallit A-mut allakkatigut december 2015-imeersutigut suliami illua'tungiusup isumaanik tusarniaatitut nassiuppakka.

A-p oqaaseqaatai allakkatigut 27. december 2015-imeersutigut tiguakka. Allakkanit taakkunannga ilaatigut makku erserput:

“[...]

Unioqqutitsilluni taxartoqartarsimangersoq imaluunniit taamaaliortoqartarsimannginnersoq pillugu suliap paatsuugassaangitsumik imarisaa kommunip kingulermik allagaani nutaarsiassartaqanngilaq. Uangattaarmi allaaserineqareersut saniatigut allanik paasissutissiisinnaanngilanga. Ilumoorlunga oqarsinnaavunga

taxarnikka tamarmik sulinermut attuumassuteqarluinnartarsimammata aamma suliffeqarfimmut pitsaanagerusussa eqqarsaatigalugu suliassallu uannit suliarineqartussatut naatsorsuutigineqartut malilluinnarlugit ingerlanneqartarsimallutik (peersinneqarnerma tungaanut) - minnerunngitsumik suliartoqquneqaratarsinnaallunga pigaartutut inissisimanera aamma atorfikka allaaserineqarnera tungavigalugit.

Ombudsmandip kommunimut apeqquteqaataa kingulleq pillugu allakkatigut 15. november 2015-imeersutigut oqaaseqaateqareerpunga, taamaattumillu kommunip akissutai sapinngisara tamaat naatsumik oqaaseqarfigissavakka.

Immikkoortoq 2 pillugu **“Inatsisartut Ombudsmandiata [K Kommuni] qinuigaa kommunip imminek peersitsinissaata tungaanut Utoqqaat Illuani pisinnaatitaanernik suliamut sunniuteqartunik allanngortiterisoqarsimaneranik [A-p] nassuiaataa ilassutaasumik oqaaseqaammini isummerfigeqqullugu”**

Utoqqarnut tungasuni suliassa qarfiup allannguuteqarnera pillugu piomasaaqatillu tungavigalugit allaaserisamat atatillugu oqaasissaqanngilanga - siusinnerusukkulli oqaatigisimasattut peersinneqarnerma nalaani qanoq ililluni allannguisoqarumaarnersoq aamma suliassat aalajangersimasut suut allannguuteqarumaarnersut erseqqissumik nalunaarutigineqanngillat.

Aaqqissuussinikkut 1. maj 2014-imi allannguisoqarmat tamatuma suliamut pineqartumut pingaaruteqanngitsutut oqaatigineqarnera eqqortuusorinanngilaq, pi-sormi ukioq taanna septemberimi aatsaat pimmat. Takusinnaalluarpara ulloq pineqartoq pitinnagu “paatsugassaannngitsumik” pisortatut akisussaaffik pisortamiimmat ([...-mi]), taamaattumillu tungaviatigut uannut allaanerussuteqartussaani.

Pisortap pisortaanertut akisussaasutullu inissisimanera aamma akerlerisimangi-saannarpara. Pisimasulli pillugit oqaluttuassartaq ilaatigut tunulliaqutaralugu ul-luinnarni suliassanik immaqqa uanga suliassattut ilimanannngikkaluartunik naam-massinnittarsimanera pillugu pisortap naammagisimaarinnittarsimanera nas-suiaatiginiartarsimagaluarpara. Oqareernittulli - tamakku tamarmik siusinneru-sukkut allaaserineqareerput.

Tamanna taxakortimik atuissatilluni pisortarisap qaninnerpaap akuersiteqqaar-neqartarnissaanik apeqqummut aamma atuuppoq.

Kommunip allaaserisamini allagaa una “[K Kommunip] paasinninnera suli unaa-voq taxartarsimanerit pineqartut aggeqquneqarsimanermut naalakkiuteqarnik-kulluunniit sulisitaanermut attuumassuteqanngitsut” pillugu oqartariaqarpunga taama oqarnek suliame pineqartumut tunnganngitsoq, uangami biilernerit assigiinngitsut sumut attuumassuteqarnersut nammineq nalilersorlugillu aalajangiif-figisariaqartarsimavakka. (Siusinnerusukkut nassuiarneqareersut).

Immikkoortoq 3 pillugu: **“Ombudsmandip [K Kommuni] qinnuigaa Utoqqaat Illuata nalunaarsuiffimmik taxarnerit tamarmik nalunaarsorneqarfissaannik peqannginneranik [A-p] nassuiaataa isummerfigeqqullugu”.**

Tamanna pillugu siusinnerusukkut aamma akissuteqareerpunga, tamannalu naammattutut isigisariaqarpoq. Taamaattorli taxarsimanerit allagartaat tamaasa misissussallugit aamma taxakorti eqqortumik atorneqarsimanersoq qulakkeerin-nissalluni aningaasaqarnermik isumaginnittoqarfik suliffeqarfittut allatuulli pisus-saaffeqartoq unnerluusserpalaartut/tusangiasaarerpalaartut nipeqarluni o-qartoqarnera pillugu oqartariaqarpunga suliassaq taannarpiaq uangattaaq amer-lasooriaqalunga suliarisarsimallugu. Qangaanerusoq taxaatileqatigiiffimmit akili-gassiissutinut ilanngullugu taxacheekit aamma kingusinnerusukkut biiliunneqar-nerit paasissutissartaat naqitanngortinneqartartut akiligassartaannut ilanngullu-git nassiunneqartartut misissortarsimavakka.

Taxacheekerpasuit taxacheekerpasuit kingornalu biiliunneqarnerit paasissuti-sartaat misissortarsimavakka, biiliunneqarnerit malittarisassat malillugit ilumut pisarsimanersut paasiniallugu. Isumaqarpunga unioqqutitsinerit assigiinngitsut takorloorneqarsinnaasut amerlanerit takusarsimallugit, tassaasut ulluni sulingif-figisani aamma adressit assigiinngitsut akornanni biiliunneqarnerit suliffeqarfim-mut tunngassuteqanngitsut, taasinnaasattut piukkunnarnerit taassagukkit. Ta-makku tamarmik pisortamut nalinginnaasumik paasissutissiissutigineqartarsi-mapput, tamatumalu kingornatigut pisortaq iliuuserisariaqartakkaminik iliuuse-qartarsimavoq.

Taamaattumik siusinnerusukkut oqaatigereersimasara oqaatigeqqissavara, tas-saalu uanga ukiut 29-t atorfigisimasannit soraarsitaanermik, ajornerpaaffianillu

peersitsinermik, kinguneqarsinnaasumik sooq iliuseqassasunga takusinnaanngilluinnarakku.

Immikkoortoq 4 pillugu: **“Ombudsmandip [K Kommuni] qinnuigaa [A-p] 23. september 2014-imi oqaloqatigineqarnissaanut kommunip aggeqqusissutaata ataatsimiinnerlu pillugu imaqarniliap assilineri nassiateqqulugit”**.

Allakkatigut 15. november 2015-imeersutigut oqaaseqaatika naammattutut isigineqaannartariaqarput, minnerunngitsumik kommuni oqaloqatigineqarnissamut aggeqqusissummik imaluunniit ataatsimiinnermit tassannga imaqarniliamik nassaarsinnaanani nassuermat.

Kommunip ilanngussatut nassiussai assigiinngitsut pillugit

Kommunip ilanngussatut nassiussai tukakujullutik paasiuminaammata pisariaqartumik paasiuminarsaallunga oqaaseqaateqassaanga, taakkulu oqaaseqaatinut allanut attuumassuteqarpallaanngillat.

30.11.2015

Immikkoortorta qarfimmi peqqissaasoq [...] aamma sulisoqarneq pillugu inatsisileritooq [...] maileqatigiissimapput, tassanilu oqaatigineqaannarpoq Utoqqaat II-luat uanga pillunga suliamik quppersagaateqanngitsoq. Tamanna pillugu oqaaseqaateqarnissamut pissutissaqangaanngilaq, - eqqumiiginalaanngitsuunngilarli.

24. september 2014 (Suliami allagaatinik nutserineq)

[Utoqqarnut tunngasuni taamani pisortaasup] sulisoqarnermilu inatsisilerituup [...] -p] allaqatigiinnerat siusinnerusukkut takuneqareersutut ajoraluartumik [utoqqarnut tunngasuni taamani pisortaasup] tungaanit eqqunngitsumik oqaaseqaatitaqarpoq. Sulinermi piffissamik nalunaarsuiffiit pillugit ima oqarsimanerarpaanga: “Periaaseq tamanna qanganisaaqaaq, tamakkulu uanga [A] immersorneq ajorpakka”.

Taama oqaaseqaateqarneq ingasalluinnartuuvoq uangalu taama oqarsimanngisaannarpunga, - oqaaseqaallu isumaqatiginngilluinnarpara. Suleqatigiiaat assigiinngitsut sulinermi piffissamik nalunaarsuiffii uanga qaammatit tamaasa ukior-

passuarni piffissarujussuaq atorlugu misissortarsimavakka, tassami sulinermi piffissamik nalunaarsuiffiup eqqortumik immersorneqartarnissaa sulisut ilaatigut aningaasarsiaqarnermikkut eqqortumik tapeqartinneqarnissaannut tunngaviummat. Sulisut amerlanersaannut sulinermi piffissamik nalunaarsuiffiit pinngitsoorneqarsinnaanngilluinnarput. Uangattaarmi suliffiup iluani suleqatigiiaat assigiinngitsut sulinermi piffissamik nalunaarsuiffiit immersorneqarnissaat pillugit piffisap ingerlanerani arlaleriarlunga ilitsersortarsimavakka.

Uanga eqqarsaatigalunga imaaginnarpoq qangaaniilli (oqartariaqarunarpunga u-toqqatserpunga taama sivisutigisumik tassani atorfeqarsimagama) sulinermi piffissamik nalunaarsuiffiup uannit immersorneqarnissaa pisariaqanngitsoq isumaqatigiissutaasimavoq, tassami aningaasarsiaakka aalajangersimasuupput suliar-toqquneqaratarsinnaanerlu pillugu tapeqarlutik, tamatumalu kingunerisimavaa qaangiuttoornerit allanillu tapeqartitaanerit atuutsinneqarsimanngisaannarsimanagerat.

Soorunalimi imminut aperisoqarsinnaavoq sulisut tamarmik sulinermi piffissamik nalunaarsuiffimmik immersuisarnissaannik piumasaqaateqarneq eqqortuunerusimannginnersoq aalajangiussanillu malinnilluarnerusimassannginnersoq, - aalajangersimasumik assigiinngiiaartumilluunniit aningaasarsiaqarneq apeqqutaatinagu. Pisortaqatigiit (kommunip oqarneratut ilaaffigisimanngisaannakkama) sulinermi piffissamik nalunaarsuiffinnik immersukkannik tunniusseqqullunga piumasaqarfiginngisaannarsimavaannga - eqqumiiginngitsuunngilarlu kommunip aningaasarsialerivianit amigaatigineqartut aamma oqaatigineqarnikuunngisaannarmata. Tamanna tunngavigalugu pissusissattut iliorsimallunga isumaqarpunga.

24. september 2014 (Suliami allagaatinik nutserineq)

Erseqqissaatigeqqittariaqarunarpara biilernerit sulluunniit suliffiup avataani pisarsimanngimmata (matumani suliffimmut suliffimmiillu nalinginnaasumik biilernerit ilanngullugit eqqarsaatigalugit). Taxarnerit amerlassusiat pillugu siusinnerusukkut soorlu taamaaliorsimasunga eqqaasitsissutigissavara biilernerit aqqaniliummata, taakku ilaat Utoqqaat Illuanniit [Napparsimmavimmut] ingerlanerusi-mapput, taareersimama saniatigut qanorluunniit oqartoqaraluarpat qaammatit pingasut ingerlanerini qaammammut sisamariarlunga-tallimariarlunga taxarlunga suliaartortarsimasunga soraaraangamalu angerlamut taxartarsimasunga eqqunngilluinnarmat pisimasinnaanngilluinnarlunilu.

[Utoqqarnut tunngasuni taamani pisortaasoq] pillugu

Naatsorsuutigaara Ombudsmandip allakkani maluginiarsimagaa [utoqqarnut tunngasuni taamani pisortaasoq] utoqqarnut tunngasuni pisortatut imaluunniit [K Kommunimi] immikkoortortaqarfimmi pisortatut suliunnaarsimasoq. Naluara suna pissutaasimanersoq, tusatsiakkallu uanga isummerfigissanngilakka. Taamaattorli eqqarsarnarpoq piffissap taama sivikitsigisup ingerlanerani (imaannguatsiarpoq upernassaq 2014-imit august 2015-imit) [...-mi (paaqqinniffimmi allami)] pisortaariarluni utoqqarnut tunngasunut pisortanngoriarluni tamatuma kingornatigut immikkoortortaqarfiup pisortaatus qaffakkiartuaarluni atorfinitsitaasarsimammat, tassanngaannarlu suliunnaarsimalluni.

Kommunip Ombudsmandimut akissutai pillugit naammattumik oqaaseqaateqarunarpunga.

Massakkut apeqqutaalerpoq: Susoqassava? Uangalu suut naatsorsuutigisinnavakka/qanoq neriuuteqarsinnaavunga?

[...]

Suna naatsorsuutiginerlugu eqqartussagukku annaasimasama naleqquttumik taarserneqarnissaat eqqaasinnaavara:

- 1985-imi nuliaralu aalajangernitsigut sulisinnanerma sivisunerpaartaani utoqqaat Illuanni najugaqartut sullisissallugit toqqarsimasakka attavigiunnaarsimavakka/najorsinnaajunnaarsimavakka. Ukiorpasuit nuannersumik ingerlasimasut tassanngaannaq akunnermit akunnermut kipitinneqarput, siumoortumik sumilluunniit piffissaliinani.
- Utoqqaat Illuanni suleqatigijaani suleqaterpassuakka nuannersut taamatutaaq attavigiunnaarsimavakka/najorsinnaajunnaarsimavakka, taamatullu tassanngaannartumik akunnermit akunnermut attavigiunnaarsimallugit, soorlu utoqqaat aamma taamaassimagikka.
- Nammineq iliuserisimasat matoorniarlugillusooq – suliunnaarnera pillugu toqqaannartumik sallunik siuararterisoqarsimasoq misigisimavara, tassami sulisut, niueqatigisartakkat sanasullu suliffeqarfiutaat ilisimatinneqarsimapput napparsimasunga tamatumalu kingornatigut soraarninngorsimasu-

nga. Tamakku tamarmik ilumuunngillat, uangalu takorluuisinnaanera ta-
maat tunngavigalugu kissaatigigaluarpara tamakku eqqunngitsut tamaasa
pillugit kommuni "pinngitsaalisaalluni" naqqiissuteqartinneqassasoq. (Soo-
runalimi soraarninngorsimavunga, kisianni kommunip taamaanneraanera-
tut pisimangilluinnartumik).

- Ingasalluinnartumik uangalu isumaga malillugu ataqqinassutsinnik innarlii-
sumik/ajuallatitsinertut pissuseqartumik oqarasuaatikkut malersuisimasu-
tut [utoqqarnut tunngasuni taamani pisortaasumit] pasilligaasimavunga.
- Aningaasarsiakka nalinginnaasut 10. oktober 2014-imiilli annaasimavakka.
Akissarsiakka nalinginnaasut akileraarutit ilanngaatinagit 29.000 koruunit
missanniipput (imaluunniit akileraarutit ilanngaatigereerlugit 18.000 ko-
ruunit missaanniillutik). 10. oktober 2014-ip kingornatigut 5.268 koruunit
soraarnerussutisiarilerpakka imaluunniit 4.615 koruunit uannut nakkartin-
neqartarput. Ulluinnarni aningaasaqarninnut tamanna qanoq assigiinngis-
suteqarsimanersoq annertuumik nassuiartariaqanngilaq. Naatsumik oqaati-
gissavara ukiuni kingullerni sisamani atorfeqarsimagama soraarnerussuti-
siassartat ilanngullugit, taamaattumik kisitsisit taasakka nalinginnaasumik
utoqqalinersiaapput.
- Aamma taaneqassaaq uanga peersinneqarnerma nalaani ukioq ataaseq af-
farlu ukiumoortumik akiliunneqarlunga feriarsinnaanermik katersisimallu-
nga, taannalu 2015-imi pisinnaasattut pisinnaatitaaffigisimagaluarpara.
Imaappoq ukiumoortumik akiliunneqarlunga feriarsinnaaneq nuliara ilan-
ngullugu akiliullugu. Tamanna peersitaanera pissutigalugu annaasimavar-
put.

Siusinnerusukkut oqaatigisattut suliaq aallartimmat [...-nik] ukioqarpunga, 1.
martsimilu inuuissiorama [...-nik] ukioqalerlunga.

Peersitaanera pitinnagu sulininnut atatillugu takorluukkakka erseqqissimagalua-
qaat, tassalu Utoqqaat Illuanni 1. august 2015-imi ukiut 30-nngortorsiorlugit
nalliuttorsiorussaagaluarpunga. Taakku saniatigut upernaakkut 2016-imi [...-
nik] ukioqalernerma nalaani soraarninngornissannik takorluuisimanikka, matu-
mani kingoraartissama atorfimmi suliassanik pitsaasumik ilitsersuunneqarnissaa
ilanngullugu.

Ombudsmandip tamakku qanoq nalilersorumaarnerai naluara, maannali oqalut-
tuaraakka, pitsaanerpaamillu neriuuteqarpunga.

Kiisalu soorunalimi erseqqissaatigissavara paasiuminaatsoqassappat imaluunniit
paasissutissanik ilassutissanik Ombudsmandip kissaatigisaanik piumasooqarpat i-
kiuunnissannut piareersimagama." (Atorfeqarfimmi nutsigaavoq)